



ИНСОН ТАҚДИРИ

Мирзакалон Исмоилӣ
таржумаси

УЧИНЧИ НАШРИ



ЎЗБЕКИСТОН ҲҚСМ МАРКАЗИЙ КОМИТЕТИ
„Ёш гвардия“ нашриёти
ТОШКЕНТ — 1964



Юқори Донда урушдан кейинги биринчи баҳор ниҳоятда яхши келди, бундақаси жуда камдан-кам бўлади. Мартнинг охирида Азов бўйларидан илиқ шамол эсди-ю, Доннинг чап қирғоғидаги қумлар икки кун ичида яп-яланғоч бўлиб қолди, даштлардаги қор тиқилиб ётган жар ва ўралар кўпчиди, дала анҳорлари музларни синдириб. шовқин солиб оқа бошлади, йўллар қарийб от-улов ўтолмайдиган бўлиб қолди.

Йўлларнинг расвоси чиққан анэ шу ёмон кунларда йўлим Бука-новская станициясига тушиб қолди. Манзил-ку унча олис эмас эди, жуда борса олтмиш километрча келарди, лекин етиб олиш осон бўлмади. Кун тугмай жўрам билан йўлга чиқдик. Икки тўйиқ от ён қайишларини таранг қилиб, оғир бричкани зўрға-зўрға тортиб борарди. Гилдираклар қор ва музларга қоришиб, намиқиб ётган қумга нақ гупчагигача ботиб кетарди. Бир соатдан кейин отларнинг биқинларида.

қоринбоғларида ва юпқа тортқилари тагида оқ, мѳмиқ кўпиклар пайдо бўлди. Эрталабки салқин ҳавода от тери анқиди, жабдуқларга кўп суртиб юборилган мойнинг ўткир ҳиди димоққа урила бошлади.

Отлар жуда қийналиб кетган жойларда аравадан тушиб яёв юрдик. Ивиган қор этикларимиз тагида билчиллаб, юришни оғирлаштирарди. Йўл бўйларида ҳали эриб улгурмаган музлар қуёш нурида биллур сингари ялтираб туради, аммо у ёқдан юриш яна ҳам қийинроқ эди. Олти соат ичида зўрға ўттиз километр юриб, охири Еланка сойидаги кечикка етиб келдик.

Моховский хутори рўпарасидан оқадиган ва ёз маҳаллари у ербу ери қуриб қоладиган бу ўртамиёна сой, ольха ўсиб, ботқоқ босиб ётган сайҳонда роса бир километр жойга тошиб кетибди. Бу сойни уч кишидан ортиқ одам ололмайдиган таги текис омонат қайиқчада ўтиш керак эди. Отларни қўйиб юбордик. Биани сойнинг ул юзида, колхоз саройида, қишдан бери ётган ва бошидан кўп савдолар ўтган «Виллис» кутиб тураб эди. Шофер иккаламиз ҳилвираб турган қайиқчага юрагимизни ҳовучлаб ўтирдик. Жўрам қирғоқда буюмлар билан қолди. Биз энди сузиб ҳам эдикки, қайиқчанинг чирик тагининг бирварақайга бир неча жойидан сув отилиб чиқди. Қўлимизда бор нарсаларни омонат қайиқчанинг тешикчаларига тикдик ва қирғоққа етиб олғунимизча ичидаги сувни ташқарига тўкиб турдик. Бир соат деганда Еланканинг ул юзига ўтиб олдик. Шофер хутордан машинани олиб келди, кейин қайиқчанинг ёнига яқинлашди-ю, эшакни қўлга ола туриб:

— Бу лаънати тоғора сувда тоб ташлаб юбормаса, икки соатларда келамиз, унғача кутманг,— деди.

Хутор анча олис эди; шунинг учун кечик атрофи шундай жимжитки, бундай жимжитлик фақат кеч кузу эрта баҳорда одамсиз жойлардагина бўлади. Сувдан зах ҳиди келади, чириган ольхалар димоғларни қичиштириб анқийди, узоқ-узоқларда кўкимтир туман пардасига бурканган Хопер бўйлари далаларидан шабада эсиб, яқиндагина қордан қутулган ерларнинг ҳамшиша сарин, нозик ҳидларини келтиради.

Яқингинамда, сой бўйидаги қумда четан ағнаб ётган экан. Мен унға бориб ўтирдим-да, папирос чекмоқчи бўлиб, курткамнинг ўнг чўнтагига қўлимни суқдим, қарасам, минг афсуски, «Беломор» пач-

каси бутунлай ивиб қолибди. Сойдан ўтиб келаётган мақалимизда чўкай-чўкай деб лапанглаб кетаётган қайиқчамизнинг четидан тўлқин ошиб ўтиб, белимгача жиққа ҳўл бўлиб кетган эдим. У маҳал папирос хаёлимга келибди дейсизми? Қайиқ чўкиб кетмасин, деб эшакни бир четга қўйиш, қайиқчадаги сувни чиқариб тўкиш керак эди. Мана энди ўз қилмишимга ўзим ачиндим, кейин чўнтагимдан ҳўл пачкани авайлаб олдим-да, чордана қуриб ўтириб, намиққан папиросларни четанга битта-биттадан ёя бошладим.

Кун қиёмга келди. Қуёш май паллаларидай қиздирарди. Мен папиросларим тезроқ қуриса экан деган умиддаман. Офтоб шундай қиздирардики, сафарга солдатча куртка билан пахталик шим кийиб чиққанимга афсус қилдим. Бу қишдан кейинги биринчи чинакам иссиқ кун эди. Ихтиёрингни жимжитлик ва танҳоликка топшириб қўйиб, четан устида мана шундай ёлғиз ўтириш ва бошингдан эски солдатча қулоқчинингни олиб қўйиб, қайиқ ҳайдаш заҳматидан сўнг ивиган сочларингни шабадада қуриштириш, паға-паға оқ булутларнинг оқиш осмонда сузиб юришини томоша қилиш кўп гашт-да.

Ҳадемай, хуторнинг энг четки ҳовлилари орқасидан бир эркак кишининг йўлга чиққанини кўрдим. У кичкина бир ўғил болани етаклаб келарди, бўйига қараганда бола беш-олти ёшларда, катта эмас. Улар кечик томонга ҳориб-толиб келишяпти, бироқ машинанинг тўғрисига етишганда мен томонга бурилишди. Эркакнинг бўйи новча бўлса ҳам, орқаси бир оз букчайган эди; у менга қадалиб келиб, бўғиқ товуш билан:

— Салом, оғайни!— деди.

Менга чўзган каттакон, дағал қўлини қисиб туриб, мен ҳам:

— Салом,— дедим.

У киши болага энгашиб:

— Амакинг билан сўраш, ўғлим,— деди.— Бу ҳам, чамаси, отангга ўхшаш шофер кўринади. Бироқ сен билан биз юк машинасида юрардик, бу эса анови кичкина машинани ҳайдар экан.

Бола мусаффо осмон сингари ёрқин кўзлари билан менинг кўзларимга рўй-рост тикилиб ва хиёл кулимсираб туриб, совуқдан қизарган қўлчасини менга дадил узатди. Мен унинг қўлини астагина силкитиб сўраддим:

— Ҳа, чол, нега бунча қўлинг совуқ? Ҳамма ёқ иссиғ-у, сен музлаб қолибсан?

У болаларга хос ёқимли бир ишонч билан тиззамга сурканди-да, оқиш қошчаларини ажабланиб чимирди:

— Мени нимага чол дейсиз, амаки? Мен ҳечам чол эмасман, боламан, мен ҳечам музлаганим йўқ. Қор ўйнадим-да, шунинг учун совуқ.

Отаси орқасидаги ғарибона халтасини олди-ю, ёнимга келиб ҳорғин ўтирди, кейин:

— Мен жўрамдан тоза куйдим-да!— деди.— Бунга етиб юрман деб ҳоли-жоним қолмади. Мен қадамимни каттароқ ташласам — бу киши йўртишга ўтадилар. Ана энди мана шунақа пиёда аскар билан юришиб кўр-чи! Бир қадам ўрнига уч қадам ташлайман, худди от билан тошбақа ҳамроҳ бўлганга ўхшаш, юришимиз ҳар хил бўлиб қолди. Буниси гўрга-я, тагин ҳазир бўлиб, кўздан қочирмай юрмасанг яна бўлмайди. Бир зум гафлатда қолдингми — бўлди: ё кўлоб кечади, ё муздан синдириб олиб, конфет қилиб сўради. Йўқ, бундақанги жўра билан сафар қилиш эркак кишига тўғри келмайди, яна пиёда сафарга-я!..— У бир оз жим қолгандан кейин мендан сўради:— Хўш, ўзингдан сўрасак, оғайни, бошлиқларингни кутиб ўтирибсанми дейман-а?

Мен шофер эмаслигимни айтишга эп кўрмай:

— Кутишга тўғри келиб қолди,— деб жавоб бердим.

— У тарафдан келишадими?

— Ҳа.

— Қайиқ тезроқ келармикан, хабаринг йўқми?

— Икки соатларда келиб қолади.

— Соз. Ҳай, майли, дам олиб ўтириб турамиз, шошиб турган жойимиз йўқ. Ёнингдан ўтиб кетаётиб, сенга кўзим тушиб қолди: бизнинг шофер оғайнимиз ўзини офтобга солиб қолибди-ку, кел, олдига бориб бир отамлашай, тамаки чекишай деб ўйлаган эдим. Ёлғиз ўлиб обрў топмаганингдек, ёлғиз чекиб хумордан ҳам чиқмайсан киши. У-ў, папирос чекар экансан-да, ишларинг беш-ку! Нима бало, ивितिб қўйибсанми дейман-а? Ҳе, оғайни, тамакининг ҳўли нима-ю, отнинг асови нима, бир чақа! Кел, менинг қўлбола тамакимдан чекайлик.

У ёзлик мош ранг шимининг чўнтагидан ўраб қўйилган тамаки халтасини олди; қизил шойидан тикилган бу халтача эскириб, ситилиб кетган эди. У халтачасини ёзаётганда, мен унинг бурчагига «Лебединская ўрта мактабининг 6-синф ўқувчи қизларидан азиэ жангчига!»— деб ипак билан ёзилган хатни кўриб қолдим.

Биз ниҳоятда кучли қўлбола тамакини чекиб, узоқ жим ўтириб қолдик. Мен ундан болани қаёққа эргаштириб кетаётганини, шундай лойгарчиликда қандай эҳтиёж уни кўчага чиқарганини энди сўрайман деб турган эдим, у мендан илгарироқ:

— Нима, урушнинг бошидан охиригача машина ҳайдадингми-а?— деб сўраб қолди.

— Бошидан охиригача деса бўлади.

— Фронтдами?

— Ҳа.

— Ҳе, огайни, мен ҳам урушда не-не балоларни кўрмадим, асти сўрама.

У бақувват, чайир қўлларини тиззасига қўйиб, букчайиб олди. Ёнидан қараб, мен аллақандай бўлиб кетдим... Сиз худди кул босгандай чексиз гам-ғусса билан тўлиб-тошган ва қараган кишининг юраги орқасига тортиб кетадиган кўзларни ҳеч маҳал кўрганмисиз? Иттифоқо учраб қолган суҳбатдошимнинг кўзлари ана шунақа эди.

У четандан битта қуруқ эгри чўпни синдириб олди-ю, индамай ўтириб, қумда аллақандай шакллар чиза бошлади, кейин яна гапга кирди:

— Гоҳи маҳаллар кечаси кўзингга уйку келмайди, очиқ кўзларингни қоронғи зулматга тикиб олиб: «Нега мени ногирон қилиб қўйдинг-а, фалак? Нима ваядан мени шундай азоб-уқубатларга солиб қўйдинг?»— деб ўйлайсан киши. Бироқ на қоронғи зулматдан жавоб бор ва на ёруғ жаҳондан... Жавоб йўқ, жавоб ололмаيمان ҳам!— Кейин, ўғлининг олдида шундай деётганини бирдан пайқаб қолиб, уни меҳр билан туртди-да:— Бор, жон ўғлим, сув бўйида ўйнаб кел, сув ёқаснда болаларга ҳар маҳал эрмак топилади. Лекин оёгингни ҳўл қилма, хўпми!— деди.

Биз жим ўтириб тамаки чекишаётганимизда, ота-болага ер остидан раэм солиб, ичимда бир аҳволга ҳайрон қолган эдим, ҳар ҳол-

да бу нарса менга жуда ғалати қўринди. Боланинг кийим-боши одмигина-ю, лекин пухта: өғнидаги барлари узун эски пиджакчаси ўзига худди қуйиб қўйгандек ўтиришидан ҳам, муъжазгина этикчаларининг юнг пайпоқ устидан сигадаган қилиб тикилишидан ҳам, пиджакчасининг қачонлардир йиртилган енги чеварлик билан ямалганидан ҳам — ҳаммасидан хотин кишининг ғамхўрлиги, моҳир она қўлининг изи сезилиб турарди. Отаси эса бошқа қиёфада: бир неча жойи куйган курткасига наридан-бери, қўполгина қилиб ямоқ солинган, эскириб кетган мош ранг шимидаги ямоқ уқувсизлик билан тикилган, тўғрироғи, эркакчасига катта-катта қилиб қавиб қўйилган, оёғида ҳали янги солдатча ботинка бўлса ҳам, қалин юнг пайпоқларини куя еган — буларга хотин кишининг қўли тегмаган... Ушандаёқ: «Бу ё бева, ё бўлмаса хотини билан тотув турмаса керак»,— деб ўйлаган эдим.

Энди у ўғлининг орқасидан анча қараб тургач, бўғиққина йўталиб олиб, яна гап бошлади, мен эсам жон қулоғим билан тингладим.

— Даставвал мен ҳам эл қатори умр қилдим. Узим асли Воронеж губернасиданман, бир минг тўққиз юзинчи йилда тугилганман. Гражданлар урушида Қизил Армия сафида, Киквидзе дивизиясида бўлдим. Йигирма иккинчи йилги очарчиликда Кубанга кетиб, қулоқларга малайлик қилдим, шунинг учун ҳам жоним омон қолди. Ота-онам, сингилчам уйда очликдан ўлиб кетишди. Узим ёлғиз қолдим. Қариндош-уруққа келсак — булар ҳам битта қолмай қирилиб кетибди. Шундай қилиб, бир йилдан кейин Кубандан қайтиб келдим, кулбамни сотиб, Воронежга бошимни олиб кетдим. Аввал дурадгорлик артелида ишладим, кейин заводга кириб чилангарликни ўргандим. Орадан кўп ўтмай уйланиб ҳам олдим. Хотиним болалар уйида тарбияланган. Етимча. Толсимга жуда яхши хотин чиқди! Мўмингина, хушчақчақ, қўл-оёғи енгил, эсликкина эди — менга сира ҳам ўхшамасди. Бир бурда ноннинг қадри нима эканлигини болалигида ноқ билгани учун ҳам, ана шу қийинчилик характериға таъсир қилган бўлса ажаб эмас. Ташқаридан қараганда, кўзга унча яқин ҳам эмас эди-ю, лекин мен унга ташқаридан эмас, ичимдан, дилимдан қарардим. Шу туфайли дунёда менинг учун ундан гўзал, ундан дилбар аёл йўқ эди, ундақаси бўлмайди ҳам!

Гоҳида ишдан чарчаб, қаҳру ғазабинг қайнаб келасан. Йўқ, ҳар

қанча ёмон гапирсанг ҳам бир оғиз ёмон жавоб қилмайди. Бирам меҳрибон, бирам мўминки, атрофингда парвона бўлади, ўтқизгани жой тополмайди, бир бурда нонингни ҳаловатда емагунингча жонини жабборга беради. Унинг жонсараклигини кўрасан-у, жаҳлингдан ҳам тушасан, бир оздан кейин эса бағрингга босиб: «Кечир, жоним Ирина, сенга итлик қилдим. Нима қилай, бугун ишим юришмади»,— дейсан. Ана шундан кейин яна апоқ-чапоқ бўлиб кетардик, кўнглим яна жойига тушарди. Бунинг ишга қанчалик таъсир қилишини биласанми, оғайни? Эрталаб ўрнимдан қушдай бўлиб турардим, заводга борардим, қўлимга қанақанги иш тушса қойил қилардим! Хотининг — умр йўлдошининг ақлли бўлиши, ана кўрдингми қандай яхши нарса!

Гоҳи маҳаллар ойлик олганингда ўртоқларинг билан ичишиб ҳам қоласан. Баъзан уйга қайтиб келаётганингда шу қадар оёқларинг чалишиб, юролмай қоласанки, сиртдан қараган киши сендан ҳазар қилади. Тор кўчани гапирмаёқ қўя қолай, ҳатто кенг кўча ҳам торлик қилиб қолади — ана расволик! Мен у маҳаллар девдек кучли, норғил йигит эдим, ичишга келганда жуда кўп ича олардим, аммо лекин уйга ҳар маҳал ҳам ўз оёғим билан юриб келардим. Гоҳи маҳаллар шундай ҳам бўлардики, уйга етай-етай деб қолганимда тезликни пасайтиришга, яъни эмаклашга мажбур бўлардим, шундай бўлса ҳам, барибир, уйга етиб олардим. Қара, шу аҳволда кириб борсанг ҳам, сендан на ўпкаланарди, на ўшқирарди ва на жанжал кўтарарди. Иражоним фақат кулиб қўя қоларди, шунда ҳам мастлиги тутиб, хафа бўлиб юрмасин деб жуда эҳтиёт билан куларди. Кийимбошимни ечиб: «Девор томонга ёт, Андрюша, уйқусираб йиқилиб-нетиб юрма тагин»,— деб пичирларди. Мен ҳам сули тиқилган қопдай каравотга ағдарилардим, кўз олдимда ҳамма нарса пирпираб айлана бошларди. Уйқумда бошимни секин-аста силаганини, меҳрибонлик билан алланималарни шивирлаганини эшитардим, раҳми келарди, демак...

Эрталаб мени ишга жўнашимдан икки соат олдин турғазарди, ўзини ўнглаб олсин дерди-да. Бош оғриғига овқат емаслигимни биларди, шунинг учун ё шўр бодринг, ё бўлмаса шунга ўхшаш бирор шўртак нарсани топиб, қиррали стаканчага ароқ қуярди-ю: «Ма, Андрюша, бош оғриғига ичиб ол, лекин бошқа ичма, жонимни қо-

қай», — деярдн. Ахир унинг шунчалик ишончига яраша иш қилмай бўладими? Ароқни ичардим-да, бир оғиз ҳам сўз айтмай, кўз қирим билан миннатдорчилик билдирардим, кейин бир ўпиб, ишга жўнардим. Борди-ю шунақанги кайфинг ванг бўлиб турганда шаънингга бирон бемаъни сўз айтиб юборгудек бўлса, шаңғилик қилса ёки сўкса борми — худо ҳақи, нақ эртасига яна ичиб келасан-да киши. Баъзи бир хотини аҳмоқ оилаларда шунақа бўлади: биламан, унақанги рў-даполарни ҳам кўп кўрганман.

Ҳадемай бола-чақалик ҳам бўлиб қолдик. Олдин ўғил, бир йилдан сўнг яна иккита қиз туғилди... Ана шундан сўнг ўртоқларимдан ўзимни тортдим. Ҳамма ойлигимни уйга ташийдиган бўлдим, бола-чақа кўпайиб, аёлманд бўлиб қолдим, ичкиликка йўл бўлсин энди. Ичсам ҳам дам олиш кунлари бир кружкагина пиво ичардим, холос.

Йигирма тўққизинчи йилда машина ҳайдашга ишқим тушиб қолди. Автомобиль ҳайдашни ўрганиб, юк машинасига ўтирдим. Кейин шу ишга шўнғиб кетиб, заводга қайтмадим. Машина ҳайдаш менга жуда қўл келиб қолди. Шу қабилда ўн йил машина ҳайдадим ва бу ўн йилнинг қандай ўтиб кетганини ўзим ҳам билмай қолдим. Худди тушдагидек ўтди-кетди. Э, ўн йил нима деган нарса! «Умринг қандай ўтганлигини сездингми?» — деб бирор кекса одамдан сўраб кўр-чи, нима деяр экан. Сезган бўлса ўлай агар? Ўтган умрни ҳув анави хира туман босган узоқ дашт деявер. Эрталаб шу дашт билан юриб келдим, ҳамма ёқ тип-тиниқ эди, йигирма километр юрдим дегунча даштни хира парда босди, мана энди бу ердан туриб ўрмонни сассиқ алафдан, бугдойзорни пичанзордан ажратолмайсан киши...

Мана шу ўн йил давомида кечани кеча, кундузни кундуз демай ишладим. Пулни ҳам яхшигина топдим, турмушимиз бошқаларникидан ёмон бўлмади. Болаларимиз ҳам яхши чиқди: учовиям аъло ўқирди, катта ўғлим Анатолий математикага шунақаям суяги йўқ эдики, уни ҳатто марказий газеталарга ҳам ёзишди. Унда бу илмга шунчалик катта талант қаердан пайдо бўлганига ўзим ҳам ҳайронман, оғайни. Қувончим ичимга сизмас эди, фахрланардим, шунчалик фахрланардимки, асти қўявер!

Ун йил ичида пича пул ҳам жамғардик, уруш олдидан икки хона,

бир қазноқ ва йўлакчадан иборат кичкина уй ҳам солиб олдик. Ирина иккита эчки сотиб олди. Бундан ортиқ яна нима керак? Болаларимизнинг ейишгани ширгуруч эди, бошпанамиз, ангил-бошимиз. пойабзалимиз бор эди, бундай қараганда, худога шукур, ўзимизга тузук эдик. Фақат уй-жойимиз нобпроқ жойга тушиб қолди. Менга авиа заводга яқинроқ жойдан олти сўтик участка ажратиб беришган эди. Уйим бошқа ерда бўлса, ким билади, турмуш ҳам бошқачароқ бўлармиди...

Бир вақт пақ этиб уруш бошланиб қолди-ку. Эртасига военкоматдан повестка келди, индинига кўрибсизки, эшелонда ўтирибмизда. Мени жигаргўшаларим: Ирина, Анатолий, қизларим — Настенька билан Олюшкалар узатиб чиқишди. Болаларим ўзларини тузук тутишди, қизларим, албатта, пича кўз-ёши ҳам қилиб олишди. Анатолий бўлса совуқ еяётгандек, нуқул кифтларини учирарди. Уша пайтда ўғлим ўн еттиларга қадам қўйган эди. Иринамга келсак... у билан ўн етти йил умр кўрган бўлсам, уни ҳеч маҳал шу аҳволда кўрмаган эдим. Кўйлагимнинг елкаси билан кўкраги Иринанинг тун бўйи тўккан кўз ёшларидан ивиб кетди, эрталаб ҳам яна шу аҳвол... Вокзалга келдик, раҳмим келганидан бечорага қарай олмас эдим... Йиғлайвериб лаблари шишиб кетди, сочлари тўзғиб, кўзлари овсарларники сингари жавдираб қолди. Командирлар вагонларга чиқиш учун буйруқ берса, Ирина кўксимга ўзини ташлаб, бўйнимдан маҳкам қучоқлаб олибди, мисоли илдизига болта урилган дарахт сингари силкинади, титрайди... Болалари ҳам тасалли беришар, мен ҳам юпатар эдим — қани энди тинса! Бошқа аёллар эрлари, ўгиллари билан бамайлихотир гаплашиб туришибди, меники бўлса новдага ёпишган япроқдай менга ёпишиб олибди, нуқул титрайди, тили сўзга келмайди. Мен бўлсам: «Ўзингни тут, жоним Ирина! Хайрлашиш чоги лоақал бир нима десанг-чи», — дейман. Ана шундан кейин Ирина тилга кирди, ҳар сўзида пиқ-пиқ йиғлаб туриб: «Жонгинам... Андрюша... бу дунёда... энди... сен билан... ҳеч кўриша олмаймиз...» — деди.

Унга раҳмим келиб, ўзимнинг юрагим тарс ёрилиб кетай деб турибди-ю, тагин шунақа сўзларни айтади. Улардан ажраб кетиш менга ҳам осон эмаслигини тушуниш керак-да, мен, ахир, қайнана-никига чўзма егани кетаётганим йўқ-ку! Аччигим келди! Бўйнимдан қўлларини олдим-у, елкасидан астагина итариб юбордим. Секингина





итарувдим шекилли, кучим қурғур кўп эмасмиди, у уч қадамча орқасига тисарилиб кетди. Кейин яна битта-битталаб юриб, қўл чўзиб келаверди, мен бўлсам: «Одам деган шунақаям хайрлашадими? Нега мени ўлмай туриб тириклайин гўрга тикасан?» — деб бақириб бердим. Қарасам... аҳволи паришон, яна бағримга босдим...

Сухбатдошим шу ерга келиб ҳикоясини узиб қўйди, мен ўртага тушган сукунатда унинг ютинганини, бўғзида бир нима билиқлаганини эшитдим. Унинг ҳаяжони менга ҳам юқди. Мен ҳикоячининг юзига ер остидан қарадим. Лекин унинг ўликники сингари кўзларида заррача ҳам ёш кўрмадим. У калласини солингириб ўтирар, фақат ихтиёрсиз тушган каттакон қўллари, ияги, қални лаблари элас-элас титрарди...

— Қўй, дўстим, вслама! — дедим паст овоз билан. Чамамда, у менинг сўзимни эшитмади шекилли, бутун вужудини эгаллаган ҳаяжонини гоят зўр бир куч билан босиб олиб, жуда ғалати бўғиқ товушда яна гап бошлади:

— Уни ўша маҳал итариб юборганим учун ўзимни ўла-ўлгунимча, охирги нафасим чиққунча кечирмайман!

У яна узоқ жим бўлиб қолди. Тамакни ўрамоқчи бўлган вади, газета қогози йиртилиб тамакиси тиззасига тўкилиб кетди. Ахир, бир амаллаб тамаки ўради-ю, бир неча бор ичига қаттиқ-қаттиқ тортди, кейин, йўталиб қўйиб, ҳикоясини давом этди...

— Иринадан ўзимни айирдим, юзини кафтларим орасига олдим, ўпдим, лаблари муз-муз. Кейин болаларим билан хайрлашдим-у, вагонга қараб югурдим, поезд юра бошлаганда ашигига сакраб чиқиб олдим. Поезд тезлигини секин-секин ошириб борди, ҳозир бола-чақамнинг ёнидан ўтиши керак. Қарасам: етимчага ўхшаб қолган болаларим бир ерга гуж бўлиб олишиб, менга қўл силташяпти, жилмайгилари келади, лекин жилмая олишмайди. Ирина бўлса қўллари кўксига босиб турибди, лаблари оппоқ, бир нималар деб шивирлайди. Мижжа қоқмай менга тикилиб турибди. Худди кучли шамолга қарши одим ташлагиси келгандек, бутун гавдаси билан олдинга қараб интиларди... У миямда худди мана шу аҳволи билан умр бўйи сақланиб қолди: қўллари кўксига босилган, лаблари оппоқ, кўзлари чақчайган, жиққа ёш... Кўп маҳал уни тушимда ҳам худди шу аҳволда кўраман... Нега мен уни ўшанда кўксидан итариб юбор-

дим-а? Эсимга тушса ҳали-ҳали юрагимни ўтмас пичоқ билан кесгандай ўртаниб кетаман...

Белая Церковь яқинида бизни Украинага юбориш учун қисмларга ажратишди. Менга «ЗИС-5» маркали машина беришди. Мен шу машинамни ҳайдаб фронтга жўнадим. Хайр, уруш тўғрисида сенга сўзлаб ўтирмасам ҳам бўлади, даставвал урушнинг қандай аҳволда эканлигини ўзинг кўргансан, биласан. Уйдан тез-тез хат олиб турардим-у, аммо ўзим онда-сонда ёзар эдим. Гоҳи маҳаллар: «Ишлар тузук, кам-кам урушиб турибмиз, ҳозирча чекинаётган бўлсак ҳам, эрта-индин куч тўплаб фрицларнинг тумшугини ерга ишқаймиз»,— деб ёзиб юборардим. Бундан бошқа яна нима ёзардинг дейсан? Кўп бемаъни вақт эди, хат ёзиш кўнгилга сизмасди. Гапнинг ростини айтсам, йиғлоқи торларни чертишга ўзимнинг ҳам тоқатим йўқ. Ҳар кун бўлар-бўлмасга: «Аҳволим жуда оғир, шўрим қуриб қолди, ўлдириб-нетиб қўйишмаса гўргайди»,— деб хотинларига ё жигарсўхталарига хат ёзадиган, сўлаги билан оқ қоғозни сувайдиган сўлакиларни жинимдан бадтар ёмон кўрардим. Ана шу шим кийиб олган қанжиқ дод-вой қиларди, одамларнинг раҳминини келтирмоқчи бўларди, сўлагини оқизарди-ю, аммо бахти қора қилинган хотинларимиз, болаларимизнинг мамлакат ичкарисиди кечириб турган ҳаётлари бизникидан ширин бўлмаганлигини тушунгиси келмасди. Давлатнинг бутун оғирлигини ўшалар кўтаришди-ку. Хотинларимиз билан болаларимизнинг елкалари ана шундай оғир юк остида букилиб қолмаган бўлса, улар қанақа елкалар экан? Шунақа, уларнинг елкалари букилмади, туриш берди! Ҳалигиндақа мишиқи, жони сабиллар дод-вой солиб хат ёзишади-ю, меҳнаткаш аёлларнинг оёғига болта уришади. Шўринг қурғур хотин ана шунақа хатни олади-да, қўлтиғидан тарвузи тушади, ишдан кўнгли совийди. Шунинг учун ҳам сен эркаксан, шунинг учун ҳам солдатсанки, зарурат бошингга солган ҳар қандай мушкулотни кўтарасан, чидаш берасан. Борди-ю, белида белбоғи бор эркак эмас, ҳажи қиз бўлсанг, унда бурмали юбка кий, суяги чиқиб турган қўймичингни юбка басавлат қилиб кўрсатсин, ҳеч бўлмаса орқангдан хотин кишига ўхша, ана ундан кейин бориб ё лавлаги чоп, ё сигир соғ, фронтга сендақасининг кераги йўқ, у ерда сенсиз ҳам сассиқ алафлар ачиб ётибди!..

Бироқ фронтда менга бир йил ҳам жанг қилиш насиб бўлмади...

Шу орада икки марта яраландим, лекин иккови ҳам енгил: биттаси— қўлимнинг этига, иккинчиси оёғимга тегди. Биринчиси — аэроплан- дан отилган ўқ, иккинчиси — снаряд синиги: Немислар машинамни тепадан ҳам, ёнидан ҳам илма-тешиқ қилиб ташлашди-ю, лекин, оғайни, дастлабки вақтларда толеим баланд келди. Баланд келишга келди, аммо охирида ўзимни ҳам кўтариб ерга урди... Қирқ иккинчи йилнинг май ойида Лозовеньки ёнида мана шундай ноқулай аҳволда асир тушиб қолдим: у маҳал немислар куч билан босиб келишаётган эди. Кунлардан бир кун юз йигирма икки миллиметрли замбарак батареямиз қарийб снарядсиз қолди. Машинамга сиққанича тўлди-риб снаряд ордим, ўзим ҳам жонимни аямай шундай юклашдимки, терлаганимдан гимнастёркам кўкракларимга ёпишиб қолди. Жанг биз турган ерга яқинлашиб келаётгани учун ниҳоятда жадал юклаш керак эди: чап томонда кимнингдир танки гумбурларди, ўнг томонда ҳам, олдинда ҳам отишмалар давом этарди, ҳадемай димоғларга куй-ган эт иси ҳам ура бошлади.

Авторотамизнинг командири мендан: «Утиб кета оласанми, Со-колов?» — деб сўраб қолди. Тавба, ҳозир сўраб ўтирадиган вақтми? Ким билади, балки у ёқда ўртоқларим ҳалок бўлишаётгандир, мен бўлсам бу ерда оғзимни очиб қараб тураманми? «Қанақа гап бўлиши мумкин! Утиб кетишим керак, тамом!» — дедим. У ҳам: «Жуда соз, ҳайда бўлмаса! Жонинг борича ҳайда!» — деди.

Мен ҳам жоним борича ҳайдадим. Умрим бино бўлиб бунақа тез ҳайдамаган эдим! Ортиб кетаётганим картошка эмаслигини, бун-дай юк билан йўлда аҳтиёт бўлиб юриш кераклигини билсам ҳам, у ёқда оғайниларим қуруқ қўл билан жанг қилишаётган, йўлни тўп-замбараклар ўққа тутиб турган бир пайтда, қанақасига аҳтиёт қилиб ҳайдашим мумкин? Машинани олти километргача учириб бордим, салдан кейин батареямиз жойлашган жарликка тушиб олиш учун қиш-лоқ йўлига бурилишим керак эди. Бундай қарасам — тавба! — йўл-нинг чап томонида ҳам, ўнг томонида ҳам пиёда аскарларимиз яйдоқ далада ёпирилиб қайтишяпти, ёнларида миналар портляпти. Энди нима қиламан? Орқага қайтиб бўладими? Жоним борича ҳайдадим!

Батареяга етиб олишимга атиги бир километрча қолди, қишлоқ йўлига ҳам тушиб олдим, лекин, оғайни, тўпчиларимиз олдига етиб боролмадим... Чамамда, машинамнинг ёнига узоққа отар тўп снаряди

келиб тушган кўринади. Снаряднинг портлаганини ҳам, бошқасини ҳам — ҳеч нимани эшитмадим, фақат калламда бир бало ёрилди, бошқа нарса эсимда йўқ. Қандай қилиб тирик қолганимга ҳайронман. Чуқурчадан саккиз метрча нарида қанча вақт ётиб қолдим — буни ҳам билмайман. Бир маҳал ҳушимга келсам, ҳеч оёғимни босиб туролмайман, калламда бир нима лўқиллайди, худди безгак тутаетгандек бутун вужудим қалтирайди. Кўз олдим қоп-қоронғи, чап елкамга бир бало бўлганга ўхшайди. Аъзойи баданим шу қадар қақшаб оғрирдикки, худди мени биров икки кечаю икки кундуз қўлига тушган нарса билан дўппослагандай. Ерда қорним билан узоқ судралдим, кейин ўрнимдан туриб олдим. Шунда ҳам қаердалигимни, менга нима бўлганлигини билолмай ҳайрон бўламан. Чамаси, эс-ҳушимни йўқотиб қўйган эканман. Ётишга яна қўрқаман. Ётсам кейин туролмай, шу ерда ўлиб қоламанми, дейман. Худди бўрон маҳалидаги мирзатеракдай, турган еримда у ёқдан бу ёққа чайқаламан.

Эс-ҳушимни йиғиб олганимдан кейин ён-веримга синчиклаб разм солдим, биров юрагимни чангаллаб сиқаётгандек эди, қарасам: мен олиб кетаётган снарядлар теварагимда сочилиб, мenden салгина нарида машинам тўнтарилиб ётибди, ҳамма ёғи илма-тешик бўлиб кетибди, жанг-чи, жанг орқамда кетяпти... Буниси қанақа бўлди?

Гуноҳни яшириб ўтиришнинг ҳожати йўқ, ана шунда оёқларим ўз-ўзидан букилди, кесилган дарахтдай йиқилиб тушдим, чунки қуршовда эканимни, тўғрироғи, фашистларга асир тушиб қолганимни англаган эдим. Ана, кўрдингми, урушда нималар бўлмас экан...

Эҳ, оғайни, ихтиёрсиз асирга тушиб қолишнинг нималигини англаш осон нарса эмас. Кимки буни ўз бошидан кечирмабди, ундайларнинг қалбига йўл топиб кириш, тутқунликнинг нималигини инсонларча англашиш жуда қийин.

Хайр, шундай қилиб йиқилган еримда танкларнинг гулдуросини эшитиб ётдим. Немисларнинг ўрта огирликдаги тўртта танки мен снарядлар олиб жўнаган томонга қараб ёнимдан гумбурлаб ўтиб кетди.... Ахир бунга қандай чидаб бўлади?! Кейин замбаракларни судраб шатак машиналар, дала ошхоналари, ундан кейин пиёда аскарлар ўтди, лекин булар унча кўп эмас, жуда борса титиғи чиққан бир ротача келарди, холос. Кўз қири билан уларга қараб-қараб қўяр-



дим-да, яна бетимни ерга босиб, кўзларимни юмиб олардим: уларни кўрсам кўнглим айнир, дилим сиёҳ бўларди.

Ҳаммаси ўтиб кетгандир деб ўйлаб бошимни кўтариб қарасам, олтига автоматчи мендан юз метрча наридан ўтиб боряпти. Бир вақт қарасам йўлдан бурилиб, мен томонга келишяпти. Ҳеч шарпа чиқаришмайди. «Ана, ажалим ҳам етиб келди»,— деб ўйладим. Туриб ўтирдим, ётган еримда ўлгим келмади, кейин ўрнимдан турдим. Улардан биттаси мендан бир неча одим нарида елкасини силкиб, автоматини қўлига олди. Одам боласи хўп ғалати нарса-да: ўша минут менда на ваҳима ва на қўрқув пайдо бўлди. Унга қарайман-у: «Ҳо-



зир менга бир сидра ўқ узади, қаеримдан урар экан? Бошимдан отармикан ё кўкрагимдан?» — деб ўйлайман. Худди ўқлар баданимнинг қаеридан тешиб ўтиши менга барибир эмасдек.

Ораларида қорачадан келган, лаблари юпқа, кўзлари сузилиб турган хушрўйгина бир йигитча бор экан. «Ўлдирса ҳам мени шу йигит ўлдиради», — деб ўйландим ўзимча. Уйим тўғри чиқди: у автоматини мўлжалга олди. Мен ҳам индамай кўзига бақрайиб қараб туравердим. Иккинчиси, ефрейтор эканми, нима бало, ёши каттароқ, қарироқ деса ҳам бўлади, хуллас ана шуниси бир нима деб ўшқирди-ю, ҳалиги қорачадан келган йигитни бир четга итариб юборди, кейин ўзи менинг олдимга келди-да, ўз тилида алланималар деб гўлдирлаб, ўнг қўлимни тирсагимдан бука бошлади, чоғимда, мускулимни ушлаб кўргиси келди шекилли. Ҳа, ушлаб кўриб: «О-о-о!» — деди. Кейин йўлга, кунботарга ишора қилди. Чамаси: «Юриб қол, иш ҳайвони, бизнинг райхга малайлик қиласан!» — деганидир-да. Мулкдор экан, итвачча!

Қорачадан келган ҳалиги йигитнинг кўзи бирдан этигимга тушиб қолди-ю! Этигим кўринишда тузуккина эди. У қўли билан: «Еч!» — деб ишора қилди. Мен ерга ўтириб, этигимни ечиб узатдим. У қўлимдан юлгандай қилиб олди. Пайтаваларимни ҳам ечиб узатдим, кейин секин оёғидан бошигача раэм солдим. Лекин у ўшқириб, ўз тилида сўкиб берди, яна автоматини қўлига олган эди, бошқалари хахолашиб кула бошлашди. Шундай қилиб, эсон-омон қутулдим. Фақат ўша қорачадан келган йигит йўлга чиқиб олгунимча менга уч бор ўқрайиб қаради, бўри боласига ўхшаб кўзларини чақнатди, газабланди, нега энди? Худди у эмас-у, мен унинг этигини ечиб олгандай.

Начора, оғайни, иложим йўқ эди. Йўлга чиқдим, болохонадор қилиб роса ўхшатиб сўкдим-у, кейин ғарбга, асорат чоғига қараб кетдим!..

Аммо юришга мадорим қолмаганди, соатига зўрға бир километр юрардим. Олдинга қадам ташламоқчи бўласан, лекин оёғинг сени гоҳ у ёққа, гоҳ бу ёққа тайтанглатади, худди маст кишидай гандирак-латади. Пича юрганымдан кейин асир тушиб қолган кишиларимиз колоннаси орқамдан етиб келди, булар ҳам мен хиэмаат қилган дивизиядан эдилар. Уларни ўнтача немис автоматчиси ҳайдаб келарди.

Колонна олдида келаётган немис ёнимдан ўтиб кетаётиб, бир оғиз ҳам ёмон сўз айтмай, автоматининг сопи билан миямга тушириб қолди. Яхши ҳамки йиқилмадим, бўлмаса автоматидан бир сидра ўқ узади-ю, ерга михлаб қўя қоларди. Хайрият, йиқилиб кетаётганимда одамларимиз ушлаб қолишиб, колонна ўртасига олиб кириб кетишди ва ярим соатча қўлтиқлаб боришди. Ҳушимга келганимда, оғайнилардан биттаси: «Йиқила кўрма, худо асрасин! Мадоринг етмаса ҳам юравер, бўлмаса ўлдириб кетишади!» — деб пичирлади. Ана шундан кейин мадорим етмаса ҳам юриб кетдим.

Кун ботиши билан немислар конвойларини кўпайтиришди, юк машиннасига яна йигирматача автоматчи ўтқизиб, бизни илдам юргизиб кетишди. Оғир ярадорларимиз кўпинча орқада қолиб кетар, буларни автоматчилар йўл устидаёқ отиб кетишар эдилар. Асирлардан иккитаси қочиншга уннаб кўрган эди, буларни ҳам, турган гап, отиб ташлашди. Аслида нодонлик уларнинг ўзларидан ўтди, бўлмаса шундай ойдин кечада яйдоқ далага қочиб бўлармиди, яна ҳамма ёқ кафтдай кўриниб турган бўлса... Ярим кечада қарийб куйиб битган бир қишлоққа етиб келдик. Бизни тунаш учун қуббаси пачақланган бир черковга ҳайдаб олиб киришди. Пол гиштдан қилинган, солишга бир сиқим ҳам пичан йўқ, ҳаммамиз ҳам шинелсизмиз, эгнимизда фақат гимнастёркаю шим. Бир хилларимизнинг эгнимизда ҳатто гимнастёрка ҳам йўқ, фақат ички иссиқ кўйлак. Кўпроқ кичик командирларда шундай эди. Оддий аскарлардан фарқ қилиша олмасин, деб кителлари билан гимнастёркаларини ўзлари ечиб ташлашган, ийнайкейин, тўпчиларда ҳам гимнастёрка йўқ, булар замбараклари олдида терга пишиб отишаётган ерларида асир тушиб қолишган.

Кечаси шунақаям қаттиқ жала қўйдик, ҳаммамиз бутунлай ивиб кетдик. Бунинг устига гумбазни ё оғир снаряд учуриб кетган, ёки аэропландан ташланган бомба кўпориб ташлаган, томни бўлса снаряд парчалари илма-тешик қилиб юборган эмасми? Шунинг учун ҳатто меҳробдан ҳам қуруқ жой тополмайсан. Худди қоронғи қўрага тиқилган қўйларга ўхшаш, биз ҳам кечаси билан черковда гуж бўлиб ўтириб чиқдик. Кечаси қарасам, биров қўлимдан ушлаб: «Ҳой ўртоқ, ярадормисан?» — деб сўраяпти. Мен ҳам унга: «Нима ишинг бор эди, оғайни?» — деб жавоб бердим. У яна: «Мен — ҳарбий врачман, аҳтимол, сенга ёрдамим тегар?» — деди. Мен чап елкамининг

қисирлаётганини, шишиб кетганини, қаттиқ оғриётганини айтдим. У қатъий қилиб: «Гимнастёркагни еч, ич кўйлагингни ҳам!» — деди. Мен айтганларини ечдим, шундан кейин у нозик бармоқлари билан елкамни эзиб кўра бошлади, шундай эздики, кўзимга дунё қоронғи бўлиб кетди. Мен тишларимни гижиралатиб: «Сен одам доктори эмас, ҳайвон докторига ўхшайсан. Бировнинг оғриқ жойини нега бунақа эзасан, бераҳм одам экансан-ку!» — дедим. У ҳеч эзишини қўймай, жаҳли чиқиб: «Кўп вақиллайверма! Жуда сергап экансан-ку! Маҳкам бўл, мана ҳозир яна бадтарроқ оғрийди», — деди. Шундай деб туриб, қўлимни бир тортиб юборса бўладими, нақ кўзларимдан ўт чақнаб кетди!

Узимга келганимдан кейин: «Бу нима қилганинг, бадбахт фашист? Қўлим ўзи пачоқ-пачоқ бўлиб ётибди-ю, сен яна тортасан», — десам, у мийиғида кулиб қўйиб: «Ўнг қўлинг билан уриб юбормасмикинсан деб ўйловдим, тузук, оғир йигит экансан. Қўлинг пачақланган эмас, чиқиб кетган экан, солиб қўйдим. Қалай, энди оғриги пасайдими?» — деб сўради. Ҳақиқатан ҳам, кўзим очилди-қолди, оғриқ тарқала бошлади. Унга чин юрагимдан миннатдорчилик билдирдим. У қоронғида нари кетди ва яна: «Ярадорлар борми?» — деб сўрай бошлади. Чинакам доктор ана шундай бўлар экан! Тутқунда, зулматда юриб ҳам улуғ ишини қилди.

Кечамиз кўп бесаранжом ўтди. Бўшанишга ҳам чиқаришмади, иккита-иккита қилиб черковга киргизишаётганларидаёқ, конвой бошлигининг ўзи бу ҳақда огоҳлантириб қўйган эди. Аксига юриб, ораминздаги шўринг қургур бир художўй ҳожатталаб бўлиб қолса бўладими! Ўзини роса тутибди, тишини-тишига қўйиб хўп чидабди, ахир бўлмагандан кейин: «Табаррук ибодатгоҳни булғай олмайман. Мен диндор одамман, христианман! Нима қилай энди, оғайнилар?» — деб йиғлаб юборди. Бизнинг одамларимизни ўзинг биласан-ку: бировлар кулади, бировлар сўқади, яна бировлар ҳазил аралаш маслаҳатлар беради. Бошига тушган бу савдо билан бояқиш бизни анча кулдирди-ю, лекин оқибати кўп ёмон бўлди: «Ташқарига чиқаринглар», — деб эшикни тақиллата бошлади. Бироқ шу билан ўзи ҳам тил тортмай қўя қолди: фашист эшик эни бўйлаб бир сидра ўқ узди, ўқлар эшикдан тешиб ўтиб тақводор билан яна уч кишини тил тортқизмай ўл-

дирди, бир кишини оғир ярадор қилган эди, у ҳам эрталабга етмай адо бўлди.

Ўликларни бир жойга тўплаб, ҳаммамиз ерга ўтирдик, дамимиз ичимизга тушиб, ўйланиб қолдик: мушкулимиз бошданоқ хунук тус олди-ку... Бир оздан кейин бир-биримиз билан шивирлаша бошладик: ким қаердан, қайси областдан, асирга қандай тушган — шуларни сўраша кетдик. Бир взводда хизмат қилишган ўртоқлар ёки бир ротада бўлган танишлар қоронғида ҳеч нарсани кўрмай, бир-бирларини секин-секин чақира бошладилар. Бир вақт ёнимда паст овоз билан гаплашаётган икки кишининг гурунгини эшитиб қолдим. Бири: «Мабодо эртага бизни ҳайдаб кетишдан олдин қаторга турғизиб, комиссарларни, коммунистларни ва яҳудийларни чақириб қолишса, ҳа-да, взвод командири, тагин писиб-нетиб юрма! Бу ишингдан ҳеч нима чиқмайди. Нима, гимнастёркамни ечиб ташладим-у, шу билан оддий аскар бўлиб олдим, деб ўйлайсанми? Ҳеч-да! Сенинг касрингга қолгани тоқатим борми! Ҳаммадан олдин сени мен кўрсатиб бераман! Ахир, мен биламан-ку, коммунистсан, мени партиёга кир деб ташвиқот ҳам қилгансан, мана энди қилмишингга яраша жавоб бераверасан!»— деди. Бу гапни менинг чап томонимда ётган одам айтяпти, унинг нариги ёнида ётган ёш бир йигитнинг: «Ўзим ҳам сени ёмон одам деб ҳамма вақт гумон қилиб юрардим-а, Крижнев,— деган овози эшитилди.— Айниқса саводсизлигингни баҳона қилиб, партиёга киришга унамаганингаёқ шундай гумонга келган эдим. Аммо сени хоин бўлиб чиқарсан, деб ҳеч вақт ўйламаган эдим. Ахир сен етти йиллик мактабни тугатгансан-ку?» Ҳалиги одам взвод командирига: «Хўш, тугатганман, нима бўпти?»— деб танбаллик билан жавоб қилди. Ана шундан кейин иккови ҳам анчагача жим қолишди, сўнгра, овозига қараганда взвод командири бўлса керак, паст товуш билан: «Мени сотма, ўртоқ Крижнев»,— деди. Ҳалиги одам бир кулиб қўйди-да: «Ўртоқларинг фронт орқасида қолиб кетди, мен сенга ўртоқ эмасман, шунинг учун менга ялинмасанг ҳам бўлади, барибир айтаман. Ҳар кимнинг жони ўзига ширин»,— деди.

Улар жим бўлиб қолишди, менинг бутун аъзойи баданим ҳалиги ифлоснинг гапидан қақшаб титрай бошлади. «Йўқ, сен итвачча, командирингни тутиб беролмайсан, мен бунга йўл қўймайман! Сени черковдан соғ чиқармайман, ўлигингни итнинг ўлигидай, оёгингдан

судраб чиқишади!»— деб ўйладим. Бир оз тонг оқара бошлаганда қарасам, ёнимда турқи совуқ бир йигит қўлларини бошининг тагига қўйиб чалқамча тушиб ётибди. Ёнида эса бурни пучуққина, озгингина бошқа бир йигитча тиззаларини қучоқлаб ўтирибди. Эғнида ички кўйлак, рангида ранг қолмабди. «Бола бечора бу тўнғизга бас келолмайди. Ўзим тўғриламасам бўлмайди»,— деб ўйладим.

Уни секин туртиб: «Вавод командиримсан?»— деб шивирладим. У ҳеч нима демади, фақат бошини қимирлатиб қўя қолди. Мен ётган йигитга ишора қилиб: «Бу сени тутиб бермоқчимиз?»— деб сўрадим. У яна бошини тебратди. Мен унга: «Агар шундай бўлса, тез бўл, оёғидан босиб тур, тепиб юбормасин тагин! Қани! Ҳа!»— дедим-у, ўзимни ҳалиги одамнинг устига ташладим. Бармоқларим қизил ўнгачига кириб кетди. Ифлос гик дейишга ҳам улгурмади. Уни бир неча минут босиб ётганимдан кейин ўрнимдан турдим. Хоин аспаласопилинга кетиб, тили оғзининг бир четидан осилиб қолди!

Шундан кейин кўнглим бирам беҳузур бўлиб, қўлимни бирам ювгим келиб кетдики, гўё одам боласини эмас, ўрмалаб юрадиган қандайдир газандани бўғиб ўлдиргандай эдим... Умрим бино бўлиб биринчи марта одам ўлдиришим, тагин ўз одамимизни... Йўқ, қанақасига ўз одамимиз бўлсин! У етти ёт бегоналардан ҳам бадтар, хоин! Ўрнимдан турганимдан кейин взвод командирига: «Кетдик бу ердан, ўртоқ, черковнинг бағри кенг»,— дедим.

Уша Крижнев айтганидек, эрталаб ҳаммамизни черков олдида сафга турғизиб, автоматчилар билан ўраб олишди, кейин учта эс-эсчи офицер ўзлари учун хавfli одамларни ажрата бошлади. Кимлар коммунист, кимлар командир, кимлар комиссарлигини суриштирди, бироқ орамиздан бундақалар чиқмади. Хоинлик қиладиган аблаҳлар ҳам топилмади, чунки асирларнинг ярмига яқини коммунист эди, бундан ташқари, командирлар ҳам, ўз-ўзидан маълумки, комиссарлар ҳам бор эди. Икки юздан ортиқроқ асирлар ичидан улар фақат тўрт кишини ажратиб олишди. Биттаси яҳудий, учтаси оддий рус аскарлари. Русларнинг бу фалокатга учрашига сочларининг қора ва жингалаклиги сабаб бўлди. Шунақаларнинг олдига келиб: «Юде?»— деб сўрашади. Улар «Русман» дейишса ҳам, гапларига қулоқ солишмайди. «Чиқ!» дейишади, вассалом.

Бечораларнинг ҳаммасини отиб ташлаб, бизни яна ҳайдаб ке-

тишди. Мен билан биргалашиб хоинни бўғиб ўлдиришган вэвод командирини Познангача ёнимдан жилмади, йўлда кетаётиб, аҳён-аҳёнда қўлимни сиқиб қўярди. Познанда бизни мана шундай бир сабаб бир-биримиздан айирди.

Биласанми, оғайни, биринчи кундан бошлаб ўз одамларимиз томонга қочиб ўтиш пайига тушган эдим. Албатта қочаман, деб аҳд қилиб қўйган эдим. Лекин бизни Познангача ҳайдаб келиб, лагерга тиққунларича ҳеч пайтини топа олмадим. Познань лагерига қамаганларидан кейин шундай пайт тўғри келиб қолди: ўлган ҳарбий асирларимизга гўр қаздириш учун бизни май охирларида лагерь яқинидаги ўрмончага олиб чиқишди, ўша пайтлар жуда кўп оғайниларимиз юракбуругидан ўларди, гўр қазияпман-у, икки кўзим теварак-атрофга телмиради. Бир вақт қарасам: қўриқчиларимиздан иккитаси гамадди қилгани ўтирди, учинчиси эса офтобда мудраб қолди. Мен белкуракни ташладим-у, шилт этиб ўзимни чангал орасига урдим... Кейин — чопганимча йўлни кунчиқар томонга қараб солдим...

Чамамда, қўриқчиларим менинг қочганлигимни кеч пайқашганга ўхшайди. Ўша кунни қирқ километрча йўл юрибман, тавба, мендай озгин одамда шунча йўл юришга қаердан куч топилди экан? Ўзим ҳам ҳайронман! Лекин қочганим билан муродим ҳосил бўлмади: орадан тўрт кун ўтиб, лаънати лагердан анча узоқлашиб кетганимда, мени тутиб олишди. Искавуч итлар нзимдан келишиб, мени ўрилмаган сулипоя ичида босишди.

Тонг отган пайтда яйдоқ дала билан кетгим келмади, нимагаки ўрмонга кам деганда яна уч километр юриш керак эди. Шунинг учун, кундузни мана шу ерда ўтказа қолай, деб сулипояга кириб олган эдим. Сулидан пича уқалаб едим, яна керак бўлиб қолар деб, анча-мунчасини чўнтакка ҳам урдим. Бир маҳал ит товуши билан мотоциклнинг «тир-тир»и қулоғимга кирди-ю, юрагим шув этиб кетди! Нимага десанг, итларнинг овози ҳадеганда яқинлашиб келяпти. Дарров мук тушиб ётиб олдим, итлар ғажиб ташламасин, деб юзимни қўлларим билан беркитдим. Орадан кўп ўтмай итлар ҳам этиб келишди ва бир зумда жулдуз кийимларимни юлиб олишди, онадан туғилгандай, қип-яланғоч бўлдим-қолдим. Итлар мени сули-

пояда роса улоқ қилишди, охири бир эркак ит икки оёғини кўксимга қўйиб, бўғизимдан олишга чоғланиб турди, лекин тегмади.

Икки мотоциклда немислар етиб келишди. Аввал ўэлари хумордан чиққунча уришди, кейин итларни гизгизлашди, териларим билан ётларим парча-парча бўлиб узилиб тушди. Ҳамма ёғимдан қон оққан, яп-яланғоч ҳолимда лагерга олиб келишди. Қочганим учун бир ой карцерда ўтирдим, шунда ҳам ўлмадим... тирик қолдим!..


Асирликда бошимга тушган савдоларни эслаш жуда оғир, оғайни, айниқса тилга олиш яна ҳам оғирроқ... Германияда бошдан ўтган азобу уқубатларни, ўша ёқдаги лагерларда қийналиб ҳалок бўлган ёру дўстларни эсласанг — юрагинг қафасидан ўйнаб чиқиб, бўғизингда дукуллай бошлайди, нафасинг тикилиб қолади...

Икки йил асирликда юрган бўлсам, шу давр ичида мени не-не жойларга ҳайдаб боришмади! Ана шу икки йил ичида Германиянинг ярмини айланиб чиқдим: Саксонияда ҳам бўлдим — силикат заводида ишладим, Рур областида ҳам бўлдим — шахтага тушиб кўмир ташидим, Баварияда ҳам бўлдим — ишлайвериб қаддим букилди, Тюрингияда ҳам бўлдим, қўй-чи, немис ерида оёғим тегмаган жой қолмагандир дейманов! У ёқда, оғайни, табиат ҳар хил экан-у, лекин тартиб бир экан: биз шўрликларни ҳамма ерда бир хилда отиб, бир



хилда калтаклашди. Худонинг қаҳрига учрагур ярамас газандалар бизни шунақаям беаёв калтаклашар эдиларки, биз ёқларда ҳайвонни ҳам ҳеч маҳал шундай уришмайди. Ҳали мушт билан солишади, ҳали оёқ билан тегишади, ҳали резина таёқча билан уришади, қўй-чи, қўлига темир-терсак тушадими, ишқилиб, нимаики тушса шу билан солаверишади. Милтиқ қўндоқлари билан, ёғоч билан урганларини-ку айтмасам ҳам бўлади.

Нимага уришади десаңг: рус бўлганинг учун уришади, ҳали ёруг дунёдан умидинг борлиги учун уришади, ўша аблаҳларнинг ишларини қилаётганинг учун уришади. Яна ножўяроқ қараб қўйганинг,



оёғингни чакка босганинг, ноқулай ўғирилганинг учун уришади... Бескордан-бескорга уришаверади, ишқилиб, эртами-кечми уриб ўлдиришлари керак бўлгани учун уришади, охириги томчи қони бўғизига тикилиб қолсин, калтакдан ўлсин, деб уришади-да. Чамаси, Германиядаги одам куйдирадиган печкалар ҳаммамизга етмаган бўлса керак...

Ҳамма ерда овқатни бир хил беришди: ярим тўпондан қилинган юз эллик грамм эрэац-нон, шолғомли суюқ хўрда. Қайноқ сувни бўлса — бир жойда беришса, бир жойда бу ҳам йўқ. Гапираман десаг гап кўп, оғайни, ўзинг ўйлаб кўр: урушдан олдин саксон олти килограмм эдим, кузга бориб эллик килограммча қолдим. Этим бориб устухонимга ёпишди, буниси ҳам гўрга-я, қуруқ гавдамнинг узини кўтариб юришга ҳам мадорим етмай қолди! Бунинг устига иш қил, гап қайтарма, яна шунақанги оғир ишки, ҳатто аравага қўшилладиган отга ҳам малол келади.

Совет ҳарбий асирларидан бир юз қирқ икки кишини сентябрь ойининг бошларида Кюстрин ёнидаги лагердан Дрезден яқинидаги Б-14 деган лагерга жўнатишди. Шунга қадар бу лагерда бизникилардан икки мингтача асир бор экан. Ҳаммамиз бир бўлиб тош конида ишладик, немис тошларини қўл билан ковлаб чиқардик, синдирдик, ёрдик. Кундалик норма — киши бошига тўрт кубометр! Ўзимиз жонимиз қил устида осилиб, зўрга-эўрга юрибмиз-у, тагин буларнинг берган нормасини қара! Қисқаси, шўримиз мана шу ерда қурий бошлади: бирга келган юз қирқ иккита одамдан икки ой ўтар-ўтмас атиги эллик етти киши қолдик. Бунисига нима дейсан, оғайни? Одам-хўрлик эмасми? Ўзимиз ўлган одамларимизни кўлиб улгура олмаймиз-у, тагин лагерларда: «Немислар Волгоградни олишиб, энди Сибирга бостириб кетишаётган эмиш», — деган узунқулоқ гаплар тарқалиб қолди. Буниси дард устига чипқон бўлди, қаддимиз букилди, кўзларимиз ерга тикилди, гўё бизларни ҳам бегона немис тупроғи ўз қаърига тортаётгандек кўринди. Лагерь қўриқчилари бўлса ҳар кун ичкилик қилишади, ашула айтишади, суюнишади, ўйнашади.

Кунлардан бир кун, кечқурун, баракка қайтиб келдик. Кун бўйи ёмғир тинмади, жулдурларимиз шундай ивиб кетдики, сиқсанг шариллаб сув оқади, ҳаммамиз совуқда қолган итдай шамолда дағдағ титрардик, тишимиз тишимизга тегмас эди. Энгил-бошимизни

қуритгудек ёки исиниб олгудек бирон жой йўқ. Бунинг устига ўлгудек, ҳатто ундан ҳам бадтарроқ очмиз. Лекин кечқурунлари бизга овқат берилмас эди.

Мен ивиб кетган жулдурларимни эгнимдан ечиб, сўрига ташладим-у: «Уларга ҳар кун тўрт кубометр тош тайёрлаб беришинг керак, ҳолбуки бизнинг ҳар биримизнинг гўримизга бир кубометр тош ҳам етиб ортади», — дедим. Қарангки, шу аламли гаплар оғзимдан чиқди дегунча ораминдан бир муттаҳам чиқиб, лагерь комендантга шипшиб қўйибди.

Лагерь коменданти ёки уларнинг тили билан айтганда лагерфюрер Мюллер деган бир немис эди. Бўйи пастдан келган, семиз, сочлари оқиш, ўзи ҳам алақандай оқ; бошидаги сочлари ҳам, қошлари ҳам — ҳаммаси оппоқ, ҳатто кўзлари ҳам оқдан келган, бақа кўз. Русчани худди сен билан биздек гапирди, тагин волгаликларга ўхшаб «о»ни аниқ қилиб айтади. Онангни деб сўкишга келсак, ундақаси йўқ дейманов. жуда қийиб ташлайди. Лаънати бунақанги боләхонадор қилиб сўкишни қаердан ўргандийкин-а? Гоҳи маҳаллар бизни блок олдига — улар баракни шундай деб аташарди — қатор қилиб турғизиб қўярди-да, эсэсчилари билан қатор олдидан бир-бир босиб ўтарди, юрганда ҳам ўнг қўлини силтаб юрарди. Қўлида чарм қўлқоп, қўлқоп ичидан эса бармоқларимга шикаст етмасин деб қўрғошиндан зиҳрга ўхшаш алланимабало кийиб олган. Юриб бораётиб, сафда турганлардан ҳар иккинчисининг бурнига мушт уриб, қонатиб кетади. Лаънати тагин бу нарсани «гриппдан сақланиш чораси» деб айтарди. Ҳар куни аҳвол шу. Лагерда жами тўртта блок бор, бугун — биринчи блокда «гриппдан сақланиш чораси»ни кўради, эртага — иккинчисида, сўнг шу тартибда бораверади. Аммо лаънати ўлгудай интизомли эди, бир кун ҳам дам олмай ишларди.

Ана шу комендант кубометрлар тўғрисидаги ўша гапларимни айтган куним эртасига мени олдига чақиртирди. Кечқурун баракка иккита қўриқчи билан тилмоч келди-да: «Андрей Соколов ким?» — деб сўради. Мен жавоб қилдим. «Марш орқамдан, сени шахсан герр лагерфюрернинг ўзлари чақиряпти, — деди. Нимага чақираётганлиги маълум. Аспаласопилинга жўнатгани. Уртоқларим билан видолашдим, ўлгани кетаётганим ҳаммага аён эди. Бир хўрсиндим-у, чиқиб кетдим. Ўзим лагерь ҳовлисида кетяпман, кўзларим юлдузларда,

улар билан ҳам видолашдим. Ҳазимча: «Ана, Андрей Соколов, яъни лагерь тили билан айтганда, уч юз ўттиз биринчи, азобу уқубатдан қутулдинг энди!»— деб ўйлайман. Бирдан Ирина билан болаларимга юрагим ачишиб кетди, кейин юрак ўртаниши босилиб, ўзимни қўлга ола бошладим: тўппончанинг оғзига солдат дадиллиги билан қарашим, ҳаётдан ажраш мен учун ҳам оғир эканини ўлимим олдида душманларга сездириб қўймаслигим керак...

Комендант бўлмаси — худди биз ёқлардаги яхши клубларга ўхшаш топ-тоза, деразаларга гуллар қўйилган, стол теваарагида эса лагерь бошлиқлари ўтиришибди. Беш киши ўтириб шнапс ичишяпти, закускасига чўчқа мойи уришяпти. Стол устида очилган катта шнапс шишаси, нон, чўчқа мой, ивитилган олма, очиб қўйилган ҳар хил консерва банкалари бор. Бир зумда ана шу нозу неъматларга кўз югуртириб чиқдим, сенга ёлгон — менга чин, кўнглим беҳузур бўлиб кетди, қайт қилиб юборишимга сал қолди. Ҳазим бўрига ўхшаб оч юрсам, одамдек овқатланиш аллақачон эсимдан чиқиб кетган бўлса-ю, бу ерда шунча нозу неъматлар уюлиб ётса...

Кўнглим беҳузурлигини бир амаллаб босдим, стол устидаги нозу неъматлардан кўзларимни минг азоб билан уздим.

Қоқ рўпарамда ширакайф Мюллер тўппончасини ўйнаб ўтирибди, уни гоҳ у қўлидан бу қўлига, гоҳ бу қўлидан у қўлига ташлайди. Ҳазим эса илон сингари киприк қоқмай менга тикилиб олган. Мен қўлларимни ёнимга олдим, пошналаримни бир-бирига шақ-шуқ уриб, баланд овоз билан: «Герр комендант, ҳарбий асир Андрей Соколов сизнинг буйруғингизга биноан етиб келди!»— деб рапорт бердим. У ҳам мендан: «Шунақа дегин, рус Иван, тўрт кубометр тош чиқариш — кўплик қилар экан-да?»— деб сўради. Мен ҳам: «Худди шундай, герр комендант, кўплик қилади»,— деб жавоб бердим. «Менга қара, сенинг гўрингга бир кубометри етадими?» «Худди шундай, герр комендант, етиш у ёқда турсин, ортиб ҳам қолади»,— дедим.

Шундан кейин у ўрнидан туриб: «Сенга битта яхшилик қилишим мумкин: бу сўзларинг учун ҳозир сени ўз қўлим билан отиб ўлдираман. Бу ер ўнғайсиз, ташқарига юр, ўша ерда нариги дунёга паттангни оласан»,— деди. Мен: «Ихтиёрингиз»,— дедим. Шундан кейин у типпа-тик турган ерида ўйланиб қолди, кейин тўппончасини

столга ташлаб, стаканга тўлдириб шнапс қўйди, бир бурда нон олди, устига бир тишламча чўчқа мойи қўйди-да, ҳаммасини менга тутиб: «Улиш олдидан немис қуролининг галабаси учун ичиб юбор, рус Иван!»— деди.

Мен ичкиликни ҳам ичишим, егиликни ҳам ейишим мумкин эди, лекин ҳалиги сўзларини эшитиб, бамисоли чўғ босиб олган одамга ўхшаб кетдим! Ичимда: «Мен-а, рус солдати-я, немис қуролининг галабаси учун ичармишман-а?! Ундан кўра... емайсанми шу гапларингга, герр комендант? Менга барибир эмасми ўладиган бўлганимдан кейин? Э бошингни есин ўша ароғинг!»— деб ўйладим.

Стаканни ҳам, нон билан ёғни ҳам столга қўйдим: «Зиёфатингиз учун ташаккур, лекин мен ичмайман»,— дедим. У тиржайиб: «Бизнинг галабамиз учун ичгинг келмаяптими? Бўлмаса ўлаётганинг учун ич,— деди. Нафсамбирга, мендан нима кетади? «Мен ўзимнинг азобу уқубатлардан қутулиб ўлаётганим учун ичаман»,— дедим унга. Шу сўзни айтдим-у,— стаканни олиб икки ҳўплаб ичиб ташладим, нон билан мойга эса қўл ҳам тегизмадим, кафтим билан лабларимни мулойимгина артдим-да: «Зиёфат қилганлари учун ташаккур. Мен тайёрман, герр комендант, юринг, мени олиб чиқиб паттамни қўлимга беринг»,— дедим.

Лекин у менга диққат билан қаради-да: «Улишдан олдин бирор нарса еб ол, ахир»,— деди. Мен унга: «Биринчи стакандан кейин оғзимга ҳеч қанақа овқат олмайман»,— деб жавоб бердим. У иккинчи стаканни тўлдириб узатди. Буни ҳам бир кўтаришда ичиб юбордим-да, яна овқатга қўл урмадим, шундай қилиб, ўзимни дадилроқ тутмоқчи бўлдим ва: «Ташқарига чиқиб жонимдан айрилишдан аввал, ҳеч бўлмаса бир ичиб олайин»,— деб ўйладим. Комендант оқиш қошларини кериб туриб: «Нимага овқат емайсан, рус Иван? Тортинма!»— деди. Мен бўлсам: «Кечирасиз, герр комендант, иккинчи стакандан кейин ҳам оғзимга овқат олиш одатим йўқ», деб айтдим. У лунжларини шишириб пиқирлади, кейин шунақаям қаҳқаҳа уриб кулиб юбордики, асти қўяверасан! Кулиб туриб немисчалаб бидирлаб кетди, чоғимда, менинг гапимни дўстларига таржима қилиб берди шекилли. Улар ҳам кулиб юборишди, стулларни жилдириб, турқларини мен томонга ўгира бошлашди. Бундай разм солсам, менга қарашлари энди анча мулойимлашгандай.

Комендант учинчи стаканни қуяпти-ю, кулгисининг аўридан қўллари яланг қалтирайди. Бу стаканни мен шимириб ичдим, нондан бир тишладим-да, қолганини столга қўйдим. Очдан ўлаётган бўлсам ҳам уларнинг нишхўрдига зор эмаслигимни, менда ўзимнинг гурурим ва иззати нафсим борлигини, улар ҳар қанча ҳаракат қилишса ҳам, барибир мени ҳайвонга айлантириша олмасликларини лаънатларга бир кўрсатиб қўйгим келди.

Шундан кейин комендантнинг турқи жиддийлашди, кўкрагидаги иккита темир крестини тўғрилади-да, стол ёнидан қуролсиз айланиб ўтиб: «Менга қара, Соколов, сен чинакам рус солдати экансан, ботир солдат экансан! Мен ҳам солдатман, шунинг учун довюрак душманимни ҳурмат қиламан. Сени отмайман. Нимага десанг, бугун бизнинг шавкатли қўшинларимиз Волга дарёсига етиб борди ва Волгоградни бутунлай эгаллади. Бу — биз учун ниҳоятда катта шоду хуррамлик, шу туфайли ҳаётингни олижаноблик билан ўзингга тортиқ қиламан. Блокингга боравер, ҳа, манави — довюраклигинг учун»,— деди-ю, столдан муъжазгина бир буханка нон билан бир бўлак чўчқа мойи олиб берди.

Нонни кучимнинг борича бағримга босдим, мойни чап қўлимга олдим, ишнинг кутилмаганда шу хил тус олишидан чунонам шошиб қолдимки, раҳмат ҳам айтмасдан, чап томоним билан гир айландим-у, эшикка қараб юрдим. Бироқ ичимда: «Ҳозир куракларим орасидан отади, овқатларни оғайниларимга етказиб беролмайман»,— деб ўйладим. Йўқ, отмади. Бу сафар ҳам ажал совуқ нафасини юзимга уриб ёнимдан ўтиб кетди...

Комендант бўлмасидан тетик юриб чиқдим, лекин ташқарида оёқларим чалиша бошлади. Баракка кириб келдим-да, ҳушимдан кетиб цемент полга йиқилиб тушдим. Уртоқларим мени тонг ёришмай уйғотишди: «Нима бўлди, гапир?»— дейишди. Мен комендант бўлмасида ўтган гапларни эслаб, ҳаммасини сўзлаб бердим. Ёнимдаги сўрида ётган қўшним овози титраб: «Нон билан мойни қандай бўламиз?»— деб сўради. Мен: «Ҳаммага баравар бўлавер»,— дедим. Ҳадемай тонг ҳам ёришди. Нон билан ёғни йўғон ип билан бўлдик. Ҳар кишига гугурт қутисидай-гугурт қутисидай нон тегди: ҳатто ҳар бир увоққача тенг бўлишиб олдик. Ёгга келсак: ўзинг биласан-ку,

лабларимизни бир-бир мойлаб олишга зўрға етди. Ишқилнб, ҳаммасини бежанжал баҳам кўрдик.

Орадан кўп ўтмай, биздан уч юзтача энг бақувват кишини ажратишди-ю, ботқоқ қуритгани юборишди. У ердан кейинча Рур областига шахтага жўнатишди. Ўша ерда қирқ тўртинчи йилгачайин қолиб кетдим. Бу орада бизникилар Германиянинг қовургасини синдирган, фашистлар энди асирлардан жирканмайдиган бўлиб қолишган эди.

Кунлардан бир кун кундузги сменанинг ҳаммасини чиқариб сафга тизишди. Аллақайқдан келган обер лейтенант тилмоч орқали: «Армияда ёки урушдан олдинги даврларда кимда-ким шофер бўлиб ишлаган бўлса, бир қадам олдинга чиқсин!» — деб буюрди. Эски



шоферлардан еттитамиз олдинга чиқдик. Бизга кийилган эски кор-жома беришди; кейин конвой билан Потсдам шаҳрига юборишди.

У ерга қелганимиздан кейин ҳаммамнэни ҳар томонга бўлиб юборишди. Мен «Тодте»да ишлашга тайинландим. «Тодте» — немисларда йўл ва мудофаа иншоотлари қурилишини бошқарадиган бир маҳкама экан. Армия майори мартабасидаги бир немис инженерининг «Опель-адмирал» маркали машинасини ҳайдадим. У баччағар жудаям семиз фашист эди-да! Пак-пакана-ю, қорни ката, энига ҳам, бўйига ҳам баб-баравар, орқасидан худди тарвақайлаб кетган хотин кишига ўхшайди. Олдиндан қарасанг — мундирининг ёқаси устидан уч қават бақбақаси осилиб туради, орқасидан қарасанг — бўйнида уч қатор йўғон-йўғон тириши бор. Менинг комчўтимга қараганда жирининг ўзи уч пуд келарди. Юрганда худди паровоздай пишиллаб юрарди, овқат егани ўтирса-чи — ўзингга ҳазир бўлавер! Гоҳи маҳаллар бутун кун бўйи овқат еб, флягадан коньяк ичгани-ичган. Овқатига аҳён-аҳёнда менинг ҳам оғзим тегиб қоларди. Сафарга чиққанимда машинани тўхтатиб қўйиб, колбаса, пишлоқ кесиб ерди, ичарди. Кайфи чоғроқ пайтларида итга ташлагандек, менга ҳам бир тишлам, икки тишлам овқат ташларди. Ҳеч маҳал қўлимга бермасди, йўқ, буни ўзига эп кўрмасди. Ишқилиб, ҳар нима бўлганда ҳам, бу ердаги ҳаётимни лагерь билан тенглаштириб бўлмасди, шу сабабдан афти-ангорим аста-секин одамга ўхшаб, оэ бўлса ҳам эт қўя бордим.

Мен икки ҳафтагача майорни Потсдамдан Берлинга, Берлиндан яна Постдамга олиб бориб, олиб келиб юрдим, шундан кейин уни бизнинг қўшинларимизга қарши мудофаа иншоотлари қуриш учун фронт яқинига жўнатишди. Ана энди кўзимдан бутунлай уйқу қочди: ўз томонимизга — Ватанимга қандай қилиб қочиб ўтсам экан, деб кечаси билан ўйланиб чиқадиган бўлдим.

Биз Полоцк шаҳрига келдик. Тонготар пайт эди, кейинги икки йил ичида биринчи марта ўз тўпларимизнинг кучли наърасини эшитдим. Қани энди, оғайни, юрагим ўшанда қандай ура бошлаганини билсанг? Ҳатто бўйдоқлик чоғимда Ирина билан учрашган пайтларимда ҳам юрагим бунчалик урмаган эди! Жанг Полоцкдан шарқроқда, биздан ўн саккиз километрча узоқда борарди. Шаҳардаги немисларнинг газаби қайнаб, асаби бузилиб қолди. Менинг бўрдо-

қим эса ичкиликка зўр бера бошлади. Кундузлари шаҳардан ташқарига чиқардик — у истеҳкомлар қурилишига раҳбарлик қиларди. Кечаси шаҳарга қайтиб келиб ўзи ичар эди. Шу алфозда майорим шишиб кетди, кўзларининг ости халта бўлиб осилиб қолди...

«Етар энди шунча кутганим — пайт келди! Қочишим керак. Лекин ёлғиз ўзим эмас, манави бўрдоқини ҳам олиб қочишим керак — бизникиларга жуда асқотиб қолади!» — деб ўйладим.

Харобазор ичидан икки килограммлик қадоқ тош топиб олдим, керак бўлган пайтда қон чиқмайдиган жойинга уриб беҳуш қилишга ярар, деган мақсад билан уни машина артадиган эски латтага ўраб яшириб қўйдим. Кейин йўлдан бир бўлак телефон симини топиб, бунини ҳам яширдим. Хуллас, ўзимга керак бўладиган нарсани тахт қилиб, олдинда ўтириладиган жойнинг тагига беркитиб қўйдим. Немислар билан хайр-маъзур қилишдан икки кун аввал, кечқурун, машинага бензин-қуйиб келаётсам, бир немис унтери деворни ушлаб зўрға-зўрға юриб кетяпти, қарасам: ўлгудай маст. Дарров машинани тўхтатиб, уни харобазорга бошлаб кирдим. Чаққонлик билан эгнидан мундирирни, бошидан пилоткасини ечиб олдим. Буларни ҳам олиб бориб, ўтириладиган жойнинг тагига беркитдим-у, шўп этиб жўнаб қолдим.

Йигирма тўққизинчи июнь кунини эрталаб майорим мени шаҳардан ташқари, Тросници томонга олиб борасан, деб буюрди. Майор у ерда мудофаа қурилишларига раҳбарлик қилар эди. Йўлга чиқдик. Майор орқа ўринда бамайлихотир мудраб ўтирарди. Менинг эса юрагим қинидан чиқиб кетай-кетай дейди. Машинани шитоб билан ҳайдадим, лекин шаҳардан чиққанганимиздан кейин газни камайтириб, секин тўхтатдим-да, машинадан тушдим, теварак-атрофга кўз югуртирдим: орқада, ҳали жуда узоқда иккита юк машинаси судралиб келяпти. Қадоқ тошни олдим, эшикни кенгроқ қилиб очдим. Бўрдоқим орқасига суяниб, худди хотинининг пинжида ётгандай хуриллаб ухляпти. Қадоқ тош билан чап чаккасига пақиллатиб бир туширдим. Калласи шилқ этиб пастга огди. Эҳтиёти шартдан яна бир марта урдим, лекин ўлдиргим келмади. Мен уни тирик олиб қочишим керак, чунки у бизнинг одамларимизга анча-мунча керакли нарсаларни айтиб беради. Қинидан «парабеллум»ини чиқариб чўнтагимга солиб қўйдим. Машина тез юрганда майор ён-верига йиқилиб кетмасин, деб орқадаги ўринга монтировкани қоқдим, кейин майорни бўйнидан те-

лефон сими билан монтировкага маҳкам боғлаб қўйдим. Ана шундан кейин апил-тапил немис мундири билан пилоткасини кийиб олдим-у, машинани ерни ларзага келтириб жанг гуриллаётган томонга суриб кетдим.

Немисларнинг олдинги маррасига икки дзот ўртасидан кесиб ўтдим. Блиндаждан автоматчилар югуришиб чиқишди, мен улар майорни кўришсин, деб машинани жўрттага секироқ ҳайдадим. Бироқ автоматчилар, у ёққа ўтиб бўлмайди, деб ҳой-ҳуй кўтаришди, қўлларини силташди. Мен бўлсам ўзимни уқмаганга солдим-да, газни қўйиб, кучимнинг борича ҳайдадим. Улар эс-ҳушларини йиғиштириб олиб, машинани пулемётга тута бошлагунларича, мен бетараф ерга етиб олиб, замбарак ўқлари ўпирган чуқурлар орасидан машинани худди қуёндек, физиллатиб ўтиб кетдим.

Мана энди немислар орқадан уриб беришди, ўзимизникилар ҳам жин чалгандай автоматга тутиб қолишди. Шамол тўсадиган ойнакни тўрт еридан ўқ тешиб ўтди, радиаторни ҳам расво қилди... Ана кўл тепасидаги ўрмончага етай деб қолдим. Бизникилар машинага қараб чопиб қолишди. Мен машинани бир сакратиб, ўрмончага чиқиб олдим-у, эшигини очиб, ўзимни ерга отдим, тупроқни ўпа бошладим, ҳаллослаганимдан ҳатто нафас ҳам ололмай қолдим...

Елкаларига погон тақиб олган ёш бир аскар ҳаммадан олдин етиб келди. Мен бунақа погонларни биринчи марта кўришим — анграйиб қолдим: йигит гижиниб «Ҳа-ҳа, ит эмган фриц, адашиб қолдингми?» — деди. Мен дарров устимдаги немис мундирини ечдим, пилоткани олиб ерга урдим-да: «Эҳ, дардингни олай! Жон ўғлим! Асли зотим воронежлик-у, мен сенга қанақасига фриц бўлай? Асир тушиб қолган эдим, билдингми! Ҳозир анави машинадаги тўнғизни ипидан бўшатинглар, портфелини олинглар, кейин мени командирларинг олдига бошлаб боринглар», — дедим. Тўппончани ҳам топширдим, кейин қўлдан-қўлга ўта-ўта, кечга бориб дивизия командирининг — полковникнинг ҳузурида бўлдим. Унгача қорнимни тўйгазишди, ҳаммомга туширишди, тергов қилишди, янги форма беришди. Хуллас, полковникнинг олдига тоза қалб, тоза тан билан башанг формада кириб бордим. Полковник ўтирган еридан туриб мен томонга юриб келди. Ҳамма офицерлар олдида мени қучоқлаб: «Немислардан олиб келган совғанг учун раҳмат сенга, солдат. Сенинг майоринг

портфели билан биз учун йигирмата «тил»дан ҳам қимматлироқ туради. Сенга ҳукумат мукофоти олиб бериш тўғрисида қўмондонлик олдига илтимос билан кираман»,— деди. Мен бўлсам унинг бу сўзларидан, кўрсатаётган меҳрибонлигидан қаттиқ ҳаяжонга тушдим, хурсандлигимдан лабларим титради, фақат зўрғатдан: «Илтимос қиламан, ўртоқ полковник, мени ўқчи қисмга юборсангиз»,— дея олдим.

Лекин полковник кулиб, елкамга қоқди. Кейин: «Ўзинг зўрга оёқда турибсан-ку, тагин қанақасига жанг қиласан? Бугуноқ сени госпиталга юбораман. Касалингни тузатишади, боқишади, кейин бир ой отпуска бераман, бола-чақангнинг олдига бориб келасан, қаёққа юборишимизни қайтиб келганингдан кейин кўраимиз»,— деди.

Полковник ҳам, унинг блиндажидаги офицерлар ҳам чин қалбдан хайрлашиб қолишди. Мен у ердан ниҳоят даражада ҳаяжонланиб чиқдим. Чунки икки йил ичида одамларча муомалани кўрмай, бунақанги муомалаларни эсдан чиқариб юборган эдим. Яна шуниси борки, оғайни, катталар билан гаплашганда узоқ маҳалларгача калламни бўйнимга қисиб гаплашиб юрдим. Нимага десанг, у ёқларда уриб юбормасин деб шунақа қилишга одатланиб қолган эдим-да. Мана кўрдингми, фашистлар лагерида саводимизни қай тахлитда чиқаришди...

Госпиталдан дарҳол Иринага хат ёзиб юбордим. Асирликда бўлганимни, немис майорини олиб қочиб келганимни — ҳаммасини қисқагина қилиб ёздим. Тавба, бу болаларча мақтанчоқлик менда қаердан пайдо бўла қолди-а? Полковник мени мукофотга тақдим қилганини ҳам ичимда сақлаб туролмай айтиб қўйдим...

Икки ҳафта муттасил ётиб ухладим, едим, ичдим. Мени оз-оз-у, лекин тез-тез овқат бериб боқишди, башарти овқатни мул-кўл бериб юборишса, кўп еб қўйиб, нобуд бўлишим мумкин экан, доктор шундай деб айтди. Шу орада анча қувватга кириб қолдим. Икки ҳафтадан кейин эса томогимдан овқат ўтмай қолди. Уйдан жавоб бўлавермади, тўғрисини айтсам, ҳасратимдан дуд чиқа бошлади. Овқат ҳам эсимга келмай қолди, уйқум қочди, миямга ҳар хил бемаъни фикрлар келди. Уч ҳафтадан сўнг Воронеждан хат олдим. Лекин уни Ирина эмас, қўшним — дурадгор Иван Тимофеевич ёзибди. Худойим ҳеч кимга бунақа хатни раво кўрмасин! У қирқ иккинчи йилнинг

июнидаёқ немислар авиазаводни бомбардимон қилганларини, оғир бомбалардан бири тўғри менинг кулбамга тушганини хабар қилибди. Иринам билан қизларим ўша маҳал уйда эканлар... Хуллас, улардан асар ҳам топишолмабди, кулбамизнинг ўрнида эса каттакон чуқур пайдо бўлибди... Бу сафар хатни охиригача ўқий олмадим. Кўзларимни қоронғи босди, юрагим мушт бўлиб қисилди, қани энди бўшаса. Урнимга чўзилдим, бир оз ётдим. Кейин хатни охиригача ўқиб чиқдим. Бомбардимон вақтида ўғлим Анатолий шаҳарда экан. Кечқурун қишлоққа қайтибди-ю, уй ўрнида чуқур кўриб, кечаси яна шаҳарга тушиб кетибди. Кетишда қўшнимга: «Мени фронтга кўнгилли қилиб юборишларини сўрайман»,— дебди. Гап шунақа.

Юрагим бир оз қисилишини қўйиб, қулоқларимда қон дукури бошланганда, Иринамнинг вокзалда мен билан қанчалик куйиб видолашганини эсладим. Бу дунёда энди ҳеч маҳал кўришмаслигимизни хотинлик қалби сезган экан-да! Мен бўлсам уни итариб юборибман-а! Оилам, бошпанам бор эди, булар неча-неча йиллар давомида бунёдга келган эди, мана, ҳаммаси бир зумда йўқ бўлди. Бир ўзимгина қолдим. Гоҳи маҳаллар: «Шошма, пешонамдаги бу шўр тушим эмасмикан?»— деб ўйлайман. Ахир асоратда юрган йилларим, қарийб ҳар бир тун Иринам билан, бола-чақаларим билан ўзимча гаплашар, қайтиб бораман, жонажонларим, мени йўқлаб фиғон қилманглар, мен тетикман, бардамман, ҳаммасига чидаш бераман, кейин яна ҳаммамиз топишамиз, апоқ-чапоқ бўлиб кетамиз, деб уларга далда берар эдим... Демак, икки йилгача ўликлар билан гаплашиб келган эканман-да?!

Ҳикоячи бир зумгина тўхтади, кейин тамоман бошқа, узук-кесик, босиқ товуш билан:

— Кел, оғайни, бир чекишайлик, аламим ёмон ортиб кетди,— деб айтди.

Чекишдик. Эриган сувлар босиб ётган ўрмонда қизилиштон дарахтни қаттиқ тўқиллатяпти, илиқ шабада қуруқ ольха исирғаларини ҳануз танбаллик билан шитирлатяпти, кўм-кўк осмонда оқ булутлар бамисоли таранг тортилган оқ елканлар сингари ҳануз сузиб юрибди, аммо кўкламнинг улуғ ишларига. тирик жонга ҳаётда абадий ўрин беришга гайёрланаётган поёнсиз дунё ҳозирги гамгин сукунатда кўзимга бошқача кўриниб кетди.

Жим ўтириш оғир эди, шунинг учун мен:

— Кейин нима бўлди? — деб сўрадим.

Ҳикоячи, саволим малол келгандек:

— Кейинми? — деди. — Кейин полковникдан бир ой отпусқа олиб, бир ҳафта ичида Воронежга етиб бордим. Сўнг бир маҳаллар бола-чақаларим билан бирга яшаган жойимга пиёда юриб бордим. Занг сув босган чуқур хандак, теварақда белдан келадиган сассиқ кўкат... Ҳамма ёқ хилват, гўристон сукунати! Уҳ, ўшанда ҳолим жуда ёмон бўлди, огайни! Юрак-юрагимдан, ич-ичимдан эзилиб, анча вақт қайғуриб турдим, кейин яна вокзалга жўнадим. Бир соат ҳам турулмадим — ўша кунидек дивизиямга қайтиб кетдим.

Орадан уч ой ўтган бўлса керак, қора булутлар орқасидан қуёш ялт этиб чиққанидек, менинг ҳам бахтим бирдан чарақлаб кетди: ўғлим Анатолий топилди! Мен хизмат қилиб турган фронтга хат юборибди. Чамамда, ўзи бошқа фронтда бўлса керак. Адресимни қўшнимиз Иван Тимофеевичдан олибди. Хатнинг мазмунига қараганда, олдин артиллерия мактабида ўқибди, математикага бўлган таланти ўша ерда роса қўл келибди-да. Бир йилдан сўнг мактабни аъло баҳо билан тугатиб, фронтга жўнабди. Ҳозир ҳарбий даражаси капитан, ўзи «қирқ бешталиклар» батареясига командир эмиш. Олти орден ва медаллар билан мукофотланибди. Гапнинг қисқаси отаси гаранг-у, ўғли фаранг бўлиб чиқибди-да. Қувончимдан бошим нақ осмонга етди! Нима десанг де, ўз пушти камаримдан бўлган ўғлим — капитан, батарея командири, бу ҳазил гап эмас! Яна шунча ордени бор. Отаси «Студебеккер»да снаряд ва бошқа хил ҳарбий анжомлар ташийди. Бунинг ҳечқиси йўқ, отаси ошини ошаб, ёшини яшаб бўлган, капитан ўғлимнинг эса ўн гулидан бир гули очилгани йўқ — келажаги олдинда.


Ана шундан кейин кечалари қариларга ўхшаш хаёл суриб чиқадиган бўлиб қолдим: уруш тугаса, ўғлимни уйлантирсам, келин-куёв ёнида яшасам, дурадгорчилик қилсам, невараларимга қарасам, дейман-да. Қисқаси, хаёлимга нуқул шунақа қариларнинг миясига келадиган ҳар хил икир-чикирлар келадиган бўлиб қолди. Лекин бу ўйим ҳам рўёбга чиқмади... Қишда нафас олмай ҳужум қилдик, шунинг учун бир-биримизга тез-тез хат ёзиб туришга фурсатимиз бўлмади. Уруш тамом бўлиши олдида, Берлин яқинида Анатолийга эрталаб

хат ташлаган эдим, эртасига дарров жавобини олдим. Фаҳимча, Германия пойтахтига ўғлим ҳам, мен ҳам ҳар хил йўллар билан келибмиз, ўзимиз ҳам бир-биримизга жуда яқин ерда эканмиз. Қачон дийдор кўришамиз деб ичим пишади, икки кўзим йўлида. Ахир дийдор ҳам кўришдик... Худди тўққизинчи май куни эрталаб, Галаба куни немис мергани Анатолийимни отиб ўлдирди...

Чоштгоҳдан кейин ротамизнинг командири мени олди чақирди. Қарасам, ёнида мен танимайдиган бир артиллерия подполковниги ўтирибди. Мен ичкарига кириб борганимда, у ўзидан унвони баланд командирни кўргандай сапчиб ўрнидан турди. Рота командиримиз: «Сенинг олдинга келибдилар, Соколов», — деди-ю, ўзи юзини дераза томонга ўгириб олди. Баданимдан электр токи ўтгандай бўлди, бирон фалокат юз берганини юрагим сезиб қолди. Подполковник ёнимга келиб: «Ўзингни дадил тут, ота! Ўғлинг капитан Соколов бугун батарея ёнида ҳалок бўлди. Юр мен билан, ҳозир ўша ёққа борамиз!» — деди.

Мен гандираклаб кетдим-у, лекин йиқилмадим. Мана энди подполковник билан бир каттакон машинага тушиб борганимизни, вайрона кўчалардан зўрға йўл топиб ўтганимизни, сафга тизилган солдатларни, қизил бахмал ёпилган тобутни — худди тушда кўргандай





аранг эслайман, эслайман-у, лекин Анатолийни ҳали-ҳали худди ҳозир сени кўриб тургандай кўриб тураман, оғайни... Тобут ёнига келдим. Унда ўғлим ётибди, лекин бир оз ўхшамайди. Менинг ўғлим ҳар маҳал кулимсираб турган, елкалари камбар, нозик бўйин, кекирдаги ўйнаб чиққан бола эди. Бу ерда эса елкалари кенг, чиройли, ёш бир йигит ётибди: кўзлари ярим юмуқ, худди менинг ёнимдан номаълум узоқларга қараб тургандай. Фақат лабларининг бурчида кулгиси ўз изини қолдириб кетибди... Уғлим Толик шу кулгиси билан бир маҳаллар миямга ўрнаб қолган эди... Мен ўғлимни ўпиб, бир четга чиқиб турдим. Подполковник нутқ сўзлади. Анатолийнинг ёру дўстлари кўз ёшларини тўкдилар, менинг эса кўзимга ёш ҳам келмади, чамаси кўз ёшларим қалбимга сингиб кетган бўлса керак. Қалбимнинг оғриғи, балки, шундандир?..

Ўзимнинг энг сўнги қувонч ва умидимни ўзгалар юртига, немис тупроғига дафн этдим. Уғлимнинг батареяси ўз командирини олиб йўлга кузатиб ўқ узди. Ана шунда томирим худди узилиб кетгандай бўлди... Қисмимга доғи-ҳасратда куйиб, нест бўлиб келдим. Лекин орадан кўп ўтмай армия хизматидан бўшадим. Энди қаёққа бораман? Наҳотки Воронежга қайтсам! Ҳеч-да! Бир маҳал, Урюпинскда турувчи ошнам эсимга тушиб қолди. У ярадорлиги туфайли қишда армиядан бўшаб кетган эди. Ана шу ошнам бир вақтлар мени ўз юртига таклиф қилувди. Шу эсимга тушди-ю, тўғри Урюпинскка жўнаб кетдим.

Ошнам билан хотини бефарзанд бўлиб, шаҳар четида туришар экан. Ошнам инвалидликка чиққан бўлса ҳам, лекин авторотада ишлар экан, мен ҳам ўша ерга ишга кирдим. Мен ошнамнинг уйига қўндим, улар менга жой қилиб беришди. Биз районларга ҳар хил юклар ортиб борар, кузда эса ғалла ташир эдик. Анави қумда ўйнаб юрган янги ўғлим билан ўша маҳаллар танишганман.

Гоҳи кунлари рейсдан шаҳарга қайтасан-у, энг аввал қиладиган ишинг — қорин гами бўлади, ошхонага кирасан, албатта. Ҳордиқдан чиқиш учун юз грамм ўмариб ҳам оласан. Гапнинг ростини айтсам, бу лаънати ичкиликка ўша маҳаллар жуда ёмон берилиб кетган эдим... Кунлардан бир кун мана шу болани ошхонанинг олдида кўриб қолдим, эртасига яна ўша ерда кўрдим. Ўзи кичкинагина, уст-боши хароб: бутун юзига тарвуз шираси ёпишган, ширага чанг

ўтирган, ҳамма ёғи кир, сочлари тароқ кўрмаган, кўзчалари эса ёмгирдан кейинги кеча юлдузчаларидай чақнайди! У менга шунақаям ёқиб қолдики, тавба, кўрмасам туролмайдиган бўлиб қолдим. Рейсдан келдим дегунча ўшани кўргани югураман. Унинг куни ҳар вақт ўша ошхона ёнида ўтар, одамларнинг хайр-аҳсони билан тирикчилик қилар эди.

Тўртинчи куни совхоздан галла юклаб қайтдим-у, машинани тўғри ошхона томонга бурдим. Болам фақир эшик олдида оёқчаларини ўйнатиб ўтирибди. Афтидан жудаям оч кўринди. Кабина ойнасидан бошимни чиқардим-да: «Хой Ванюшка! Чиқ машинага, тез бўл, элеваторга борамиз, у ёқдан қайтиб келганимиздан кейин шу ерда бирга овқатланамиз!»— деб қичқирдим. У менинг товушимни эшитиб сесканиб кетди, эшик зинапоясидан сакраб тушди-да, машина погонасига осилиб чиқиб, паст овоз билан: «Менинг отим Ванялигини қаердан биласиз, амаки?»— деб сўради. Кейин кўзчаларини чақчайтириб, мени қандай жавоб берар экан деб кутиб турди. Мен ўзимнинг кўпни кўрган киши эканлигимни, ҳамма нарсани билишлигимни айтдим.

Сўнг кабинанинг ўнг эшигини очиб, уни ёнимга ўтқизиб олдим-да, машинамни ҳайдаб кетдим. Шундай шўх бола нимагадир бирдан жим бўлиб қолди: ҳадеб ўйланади, юқорига қайрилган узун киприклар тагидан аҳён-аҳёнда менга қараб-қараб қўяди, хўрсинади. Узи муштумдаг-у, хўрсинишни билиб олгани қизиқ! Болага ким қўйибди экан хўрсинишни? Мен:

«Отанг қаерда, Ваня?»— деб сўраган эдим, «Фронтда ҳалок бўлган»,— деб шипшиди. «Ойинг-чи?»— «Ойимни поездда келаётганимизда бомба тушиб ўлдирган».— «Қаердан келаётган эдинглар?»— «Қайдам, эсимдан чиқиб қолди...»— «Бу ерда ҳеч қариндошинг йўқми?»— «Ҳеч кимим йўқ».— «Бўлмаса кечалари қаерда ётасан?»— «Тўғри келган ерда».

Кўзимга аччиқ ёш келди. Мен шунда ўзимга: «Икковимиз айри-айри яшаб бўлмиз! Сени ўғил қилиб олганим бўлсин!»— деб аҳд қилдим. Аҳд қилдим-у, бирдан кўнглим енгил тортиб, кўз ўнгим ёришиб кетди. Сўнг унга хиёл энгашиб: «Ванюшка, биласанми, мен кимман?»— деб сўрадим секингина. У ҳам мулойимгина: «Кимсиз?»—

деб сўради. Мен унга яна боягидай паст овоз билан: «Отанг бўламан»,— деб айтдим.

Ё оллоҳ, нималар бўлмади шунда! Бирдан бўйнимга осилди. бетларимдан, лабларимдан, пешонамдан чўлп-чўлп ўпа бошлади, ўзи эса худди кичкина сивизгадай, жарангдор овоз билан шунақаям чинқирдики, ҳатто кабина ичида ҳам қулоқларимни тешгудек бўлди: «Айланай дадажон! Мени бир кун эмас бир кун ахир топиб олишингни билардим! Билардим! Албатта топиб оласан, деб ишонардим! Қачон топиб олар экансан, деб кўпдан бери ўйлаб юрардим»,— деди-ю, менга ёпишиб олди. Ўзи-чи, худди шамолда қолган нозик ниҳолдай, дир-дир титрайди. Кўзларимнинг олдини қуюқ туман босди. қўлларим титради... Қандай қилиб рулни қўлдан чиқариб юбормаганимга ҳайронман! Шундай бўлса ҳам йўл бўйидаги чуқурликка машинамни беҳосдан тушириб юбордим-да, моторни ўчирдим. Кўз ўнгимдаги туман тарқалмагунча, битта-яримтани босиб кетаманми деб, машинани юргизишдан қўрқдим. Шу қабилда беш минутча турдим, ўғилчам бўлса кучининг борича менга ёпишарди, индамаса ҳам дағ-дағ титрар эди. Мен уни ўнг қўлим билан қучоқлаб, секин ўзимга тортдим, чап қўлим билан эса машинани орқага қайтардим-у, уйимга қараб жўнадим. Шундай пайтда элеваторга бало борми, кўнгилга элеватор сигадами!

Машинани дарвоза олдида тўхтатдим-да, янги ўғилчамни қўлга олиб, уйга қараб юрдим. У қўлчалари билан бўйнимдан маҳкам қучоқлаб олиб, то уйга киргунимизча бўшатмади. Соқолим ҳам қирилмаган эди. Шу десанг юзини юзимга маҳкам босиб олибди, кўрсанг ёпишиб қолганми дейсан. Мен уни уйга шу алфозда олиб кирдим. Ошнам ҳам, хотини ҳам уйда экан. Ичкари кирдим-у, уларга кўзимни қисиб қўйиб: «Мана, ўғлим Ванюшкани топиб олдим! Қани, бизни кутиб олинглар, яхшилар!»— дедим дадил. Уларнинг ўзлари ҳам тирноққа зор эмасми, нима гаплигини дарров пайқашиб, парвона бўла қолишди. Мен бўлсам ўғлимни ўзимдан ҳеч ажрата олмайман. Кейин бир амаллаб йўлга солдим. Қўлларини совун билан ювиб, стол ёнига келтириб ўтқиздим. Ошнамнинг хотини ўғлимга бир тарелкада карам шўрва олиб келиб берди. Кейин ўғлимнинг шўрвани жуда ҳам очкўзлик билан ичаётганини кўриб, хотин бояқишнинг кўзларидан дув-дув ёш тўкила бошлади. Печка ёнида фартуғи билан кўзларини яшириб йиғлар эди. Ванюшкам унинг пиқ-пиқ йиғлаётга-

нини кўрди-ю, югуриб келиб этагидан тортди-да: «Нимага йиғлаясиз, хола, дадам мени ошхона ёнидан топиб олди, энди ҳаммамиз суюнишимиз керак, сиз бўлсангиз йиғлаясиз», — деди. Хотин шўрлик бу сўзни эшитиб, яна бешбадтар йиглаб юборди, бир зумда ҳамма ёгини кўз ёши билан ивтитди!

Овқатдан кейин ўғлимни сартарошхонага олиб бориб сочларини олдирдим. Уйга қайтиб келганимдан кейин тоғорада ўзим яхшилаб чўмилтирдим, сувдан чиқариб тоза чойшабга ўрадим. Ўғлим мени яна қучоқлаб олди ва шу кўйи қўлимда ухлаб қолди. Мен уни секин каравотга ётқиздим-да, ўзим элеваторга жўнадим. Галлани элеваторга тўкдим-у, машинани базага келтириб қўйиб, магазинма-магазин нарса излай бошладим. Ўғлимга мовут шим, кўйлак, сандал ва чиптадан қилинган шапка сотиб олдим. Лекин ҳеч қайсиси бўйига лойиқ келмади, сифатининг ҳам мазаси йўқ экан. Мовут шим олганим учун ошнамнинг хотини мени койиб ҳам берди: «Нима бало, жиннипинни бўлганмисиз? Шундай саратонда ҳам ёш болага мовут шим кийгизадими ҳеч!» — деди. Ана шундан кейин тикув машинасини даст кўтариб келиб столга қўйди-ю, сандигини ковлаштириб кетди. Хуллас, бир соат ичида Ванюшкага сатин трусик билан енги калта оқ кўйлак тикиб берди. Кечаси Ванюшка билан бирга ётдим ва узоқ вақтлардан бери биринчи марта фақат ўша кунини тинч ухладим. Шундай бўлса ҳам кечаси тўрт мартача уйғондим. Бир вақт уйғониб қарасам: хашак тагига кириб ётган чумчуққа ўхшаш, ўғлим биқинимга кириб пишиллаб ухлаб ётибди. Кўриб шунчалар кўнглим тўлдими. буни асло сўз билан айтиб беролмайман! Уйғотиб юбормайин деб қимир этгини келмайди, шундай бўлса ҳам чидамасдан секин ўрнингдан турасан-да, гуғурт чақиб уни томоша қиласан...

Тонготар олдида уйғондим. «Нимага шунчалик нафасим сиқилдийкин?» — деб ҳайрон бўлдим. Қарасам: ўғлим чойшабдан чиқиб, кўндалангчасига чўзилнб ётибди, бир оёғи томоғимда. У мана шунақа бесаранжом ётиб, одамни қийнаб юборади, шундай бўлса ҳам ўрганиб қолганман, усиз ётсам — ётгандай бўлмайман. Негаки, кечаси ухлаб ётганда гоҳ у ер-бу ерини силайсан, гоҳ тўзгиб ётган сочларини ҳидлайсан. Ана шунда ором оласан, юрагинг бўшалади, шундай қилмасам бўлмайди — юрагим доғ-ҳасрат ичида эзила-эзила тошга айланиб кетган...

Дастлабки вақтларда у мен билан машинада қатнаб юрди, кейин ўйлаб кўрсам, буниси тўғри келмас экан. Дарҳақиқат, бир ўзим бўлсам оғирим қанча? Бир буханка нону бир бош пиёз билан туз бўлса бас-да — куни билан қорним тўқ. У билан юрсам-чи — иш бўлакча: унга ҳали сут топ, ҳали тухум пишир, бунинг устига иссиқ овқат бўлмаса тагин бўлмайди. Иш ҳам шитоб, буни ҳам пайсалга солиб бўлмайди. Бир куни ўзимни қўлга олдим-у, ўғлимни ошнамнинг хотинига ташлаб кетдим. Бола фақир кечгача йиғлабди, кечқурун эса мени кутгани элеваторга қочиб кетибди. Уша ерда ярим кечагача мени пойлаб ўтирибди.

Дастлабки вақтлари у билан жуда қийналдим. Бир кун жуда чарчадим-у, қоронғи тушмасданоқ ётиб олдим. Ҳамиша чумчуқдай





чирқиллаб юрадиган ўғлим ўша кун нимагадир чурқ этмади. Мен ундан: «Нималарни ўйлаяпсан, ўғлим?» — деб сўрадим. У ҳам мендан шипга қараганича: «Дада, чарм пальтонгни нима қилгансан?» — деб сўраб қолди. Мен умрим бино бўлиб чарм пальто кийган эмас эдим. Йўл топишга тўғри келди. «Воронежда қолган», — деб жавоб бердим. У яна: «Мени нега шунча узоқ ахтардинг?» — деб сўраган эди, мен ҳам: «Жон ўғлим, сени Германиядан ахтардим. Польшадан ахтардим. Сени излаб бутун Белоруссияни айланиб чиқдим. Бу ёққа келсам, Урюпинскда экансан», — дедим. У яна: «Урюпинск Германияга яқинми? Польша бизнинг уйимиздан узоқми?» — деб сўрайди. Хуллас, кўзимиз уйқуга боргунча шу хилда жавраб ётдик.

Сен, оғайни, бола чарм пальтони бекорга сўради, деб ўйлайсанми? Йўқ, бекорга сўрагани йўқ. Демак, унинг ўз отаси бир маҳаллар ҳақиқатан ҳам шунақа чарм пальто кийган-у, ҳозир унинг эсига тушган. Боланинг эси нима-ю, ёзги чақмоқ нима: ярқ этади-ю, ҳамма ёқни бир ёритиб, яна ўчади. Шунинг сингари унинг эси шунақа, чақмоққа ўхшаб, гоҳи-гоҳида ярқираб кетади.

Урюпинскда икковимиз яна бирор йил туриб қолсак бўларди, лекин ноябрда мен бир гуноҳ қилиб қўйдим; бир кун лойгарчиликда машина ҳайдаб келаётган эдим, хуторлардан бирида машинам тойиб кетиб, битта сигирни йиқитиб юборди. Хотинларни биласан-ку, дарров дод-вой кўтаришди, одамлар йиғилди, бир зумда инспектор ҳам шу ерда пайдо бўлди-қолди. Раҳм қилгин деб ҳар қанча ялинсам ҳам инспектор қургур унамай, шоферлик билетимни олиб қўйди. Сигир бўлса ўрнидан турди-ю, думини хода қилиб, қишлоқ кўчасидан шаталоқ отиб кетди. Мен бўлсам шоферлик билетимдан айрилдим.

Қиш ичи дурадгорлик қилдим, кейин армияда бирга хизмат қилишган бир ошнамга хат ёзиб, у билан алоқа боғладим. У сизларнинг областингизда, Кашар районида шоферлик қилади. Ана шу ошнам мени ёнига чақирди. Хатида: «Ярим йилгина дурадгорлик қилиб турасан, кейин областимизда сенга янги билет беришади», — деб ёзбди. Мана шундай қилиб, ўғлим икковимиз ана ўша Кашар деган жойга яёв кетиб боряпмиз.

Мен сенга айтсам, оғайни, сигир воқеаси рўй бермаганда ҳам, барибир, Урюпинскдан кетган бўлардим. Юрагимдаги дарду алам билан бир ерда узоқ ўтира олмайдиган бўлиб қолганман. Қани,

Ванюшкам каттароқ бўлиб, мактабга берадиган вақт келсин-чи, зора ўшанда бир ерда тиниб қолсам. Ҳозирча ота-ўғил рус тупроғини сайри-сафо қилиб кезиб юрибмиэ.

— Яёв юриш болага қийин-да, — дедим мен.

Яёв юриб бўпти, узуқун елкамда! Фақат оёғи толганда ерга тушади-ю, йўл бўйида кичкина улоққа ўхшаш ирғишлай бошлайди. Буларнинг ҳаммаси гўрга-я, у билан бир кунимизни кўриб кетардиг-у, лекин юракнинг мазаси қочиб қолди, давосини қилмаса бўлмайди... Гоҳи маҳаллар шунақаям қисилиб оғрийдики, ёруғ дунё кўзимга қоронғи бўлиб кетади. Бирда эмас-бирда уйқумда ўлиб қолиб, бола бечоранинг юрагини чиқармасам деб қўрқаман. Бунинг устига яна бир чатоқ иш бор: ўлиб кетган азизларимни қарийб ҳар кеча тушимда кўраман. Мен кўпинча тиканли сим тўсилган гов ичкарисида бўламан, улар эса гов ташқарисида, эркинликда юришади... Иринам билан ҳам, болаларим билан ҳам ҳамма нарса тўғрисида гаплашаман, бироқ симни қўлим билан икки ёққа сура бошладим дегунча улар мендан узоқлашиб, кўздан ғойиб бўлиб кетишади... Шуниси қизиқки, кундуэлари ўзимни ҳамиша маҳкам тутиб юраман, оғзимдан на «оҳ» ва на «воҳ» чиқади, аммо кечаси уйғониб қарасам: болишим кўз ёшларимдан жиққа ҳўл бўлиб қолади...

Ўрмондан жўрамнинг товуши, эшкакнинг сувни чайқатиши эшитилди.

Аслда ёт бўлса ҳам, энди менга қадрдон бўлиб қолган киши ўрнидан турди, ёғочдай қаттиқ, каттакон қўлини менга чўзиб.

— Яхши қол, оғайни, бахтинг ёр бўлсин! — деди.

— Сен ҳам Кашарга эсон-омон етиб ол.

— Раҳмат. Ҳой ўғлим, юр қайиққа.

Бола отасининг олдига югуриб келди-да, ўнг томонига ўтиб, куртказини баридан ушлаб олди ва қадамини катта-катта ташлаб бораётган отасининг ёнига тушиб йўртиб кетди.

Есир қолган икки инсон, даҳшатли уруш довули билан бегона юртларга келиб қолган икки қум донаси... Уларни олдинда нима кутар экан? Мана шу рус кишиси, букилмас ирода кишиси ўзини ростлаб олади ва ёнидаги болани оталик меҳри билан ўстириб улғайтиради, вояга етказди, кейин у ватани чорлаган йўлда учрагуси

қар қандай қийинчиликларга чидай-
ди, уларни енгади, деб ўйлагинг ке-
лади.

Мен юрагимда оғир дард билан
уларнинг орқаларидан қараб қол-
дим... Бизнинг ўша ажралишимиз-
да ҳамма нарса ўз изига тушиб
кетса ажаб эмас эди, бироқ Ва-
нюшка бир неча қадам юргандан





кейин нозик оёқларини чалиштириб менга юзини ўгирди-ю, пушти ранг қўлчасини силтаб хайрлашди. Ана шунда юмшоқ, лекин тирноқли бир чангал қалбимни бирдан сиқди, мен апил-тапил юзимни ўгириб олдим. Йўқ, уруш йилларида соч-соқоллари оқариб кетган катта ёшли одамлар тушларидагина йиғлашмайди, балки ўнглирида ҳам йиғлашади. Бунда энг муҳими — ўз вақтида юзни ўгириб олишда. Бунда энг муҳими — боланинг кўнглини чўктирмасликда, ёндирувчи хасис эркак ёши бетингдан оқиб тушаётганини унга сездириб қўймасликда...

Шолохов Михаил.
Инсон тақдири. Ҳикоя. Мирзакалон Исмоилий тарж. (В. Кайдалов расмлари.) Т.,
«Еш гвардия», 1964.
56. бет. Тиражи.30000

Шолохов Михаил. Судьба человека. Рассказ.